

3722 PARVUS  
CATECHISMUS  
CATHOLICORUM  
A  
R. P. PETRO CANISIO  
SOCIETATIS JESU  
EDITUS.

*Adjunctæ Preces horariæ de æterna Dei  
Sapientia, septem Psalmi Pœnitentiales,  
& Vesperæ Dominicales.*

Huic editioni accesserunt Litanie Lauretanæ, usus, & actus Contritionis.



GANDAVI,  
Typis Joannis Meyer, viâ dictâ d'Hoog-  
poorte, sub signo ensis Coronati.  
1756.

THE UNIVERSITY OF CHICAGO  
LIBRARY

THE UNIVERSITY OF CHICAGO  
LIBRARY

1911

# C A P I T A D O C T R I N Æ C H R I S T I A N Æ

Compendio tradita, ut sit veluti parvus  
Catechismus Catholicorum.

## C A P U T I.

DE FIDE ET SYMBOLO FIDEI.

*Quis dicendus est Christianus, atque  
Catholicus?*

**Q**UI Baptismatis Sacramento  
initatus, Jesu Christi veri  
Dei, atque hominis saluta-  
rem doctrinam in ejus Eccle-  
sia profitetur, neque sectis, vel opi-  
nionibus ullis ab Ecclesia Catholica  
alienis adhæret,

A 2

*Quibus de rebus primum docendi sunt Christiani?*

De Fide, Spe, Charitate, Sacramentis, & officiis Justitiæ Christianæ.

*Quid est Fides?*

Donum Dei, ac lumen, quo illustratus homo firmiter assentitur omnibus, quæ Deus revelavit, & nobis per Ecclesiam credenda proposuit, sive scripta illa sint, sive non sint.

*Quæ summa est Fidei, seu omnium credendorum?*

Symbolum Apostolorum in duodecim distinctum articulos.

*Qui sunt illi duodecim articuli?*

Hi videlicet:

1. Credo in Deum Patrem omnipotentem, creatorem cœli & terræ.
2. Et in JESUM Christum Filium ejus unicum Dominum nostrum.
3. Qui conceptus est de Spiritu sancto, natus ex Maria Virgine.
4. Passus sub Pontio Pilato, crucifixus, mortuus, & sepultus.



*Catechismus.*

5. Descendit ad inferos, tertiâ die resurrexit à mortuis.

6. Ascendit ad cœlos, sedet ad dexteram Dei Patris omnipotentis.

7. Inde venturus est judicare vivos & mortuos.

8. Credo in Spiritum sanctum.

9. Sanctam Ecclesiam Catholicam, Sanctorum communionem.

10. Remissionem peccatorum.

11. Carnis resurrectionem.

12. Et vitam æternam. Amen.



*Quid sibi vult primus Symboli articulus,  
Credo in Deum Patrem?*

Ostendit primam in Deitate personam, patrem scilicet cœlestem & æternum, cui nihil factu impossibile fit, veldifficile, qui cœlum & terram, visibilia simul & invisibilia cuncta ex nihilo produxerit, & producta usque conservat, & gubernat, summâ bonitate & sapientiâ.

*Quid verò secundus articulus,  
Et in Jesum Christum Filium ejus?*

Commonstrat secundam in Deitate personam, Jesum Christum scilicet Filium Dei naturalem unicum illum ab æterno genitum & Patri consubstantiallem, Dominum ac redemptorem nostrum, ut qui nos perditos liberavit.

*Quid porro tertius, Qui conceptus est  
de Spiritu Sancto?*

Mysterium proponit Dominicæ Incarnationis: quia idem Dei Filius de coelis descendens, humanam naturam assumpsit, sed modo singulari prorsus, ut qui conceptus fuit sine patre, ex virtute Spiritûs Sancti, natus ex Maria virgine illibata.

*Quid verò quartus, Passus sub Pontio  
Pilato?*

Mysterium tractat redemptionis humanæ: nam idem verus Dei Filius secundum humanam illam naturam assumptam, extrema verè passus est pro nobis, & peccatoribus omnibus redimen-

## *Catechismus.*

77

dis. Unde licet agnus esset sine macula, tamen sub Pontio præside in crucem suffixus, in cruce mortuus, & deinde sepultus fuit.

*Quid autem quintus, descendit ad inferos?*

Mysterium Resurrectionis Christi complectitur, qui secundum animam quidem Patres à limbo liberaturus descendit, tertio verò post mortem die, resumpto corpore, vi propria factus est redivivus.

*Quid sextus articulus, Ascendit ad Cælos?*

Mysterium adfert gloriosæ ascensionis Christi, ut qui post expletum redemptionis nostræ opus, ad Patrem transivit ex hoc mundo, & cælos sua virtute triumphator ascendit, atque in ipsa æterna Patris gloria super omnia est collocatus.

*Quid septimus, Inde venturus est judicare?*

Demonstrat extremum judicii diem, quando Christus humana in carne visi-

bilis rursus de cœlo descender, ac tremendum aget judicem omnium proborum ac improborum, & reddet unicuique secundum opera ejus.

*Quid verò octavus, Credo in Spiritum Sanctum?*

Exhibet tertiam in Trinitate personam, Spiritum Sanctum, qui ex Patre Filioque procedens, unus verus æternusque Deus est, & regnat cum patre & Filio, proinde cum utroque simul adoratur & conglorificatur.

*Quid nonus articulus, Sanctam Ecclesiam Catholicam?*

De Ecclesia docet quatuor nobis esse credenda. Primum, Ecclesiam esse unam, nimirum in uno Spiritu Christi Jesu, in una fide fideique & Sacramentorum doctrina, in uno Capite ac Rectore universalis Ecclesiæ Vicario Christi scilicet, ac Divi Petri successore; Secundò hanc ipsam sanctam esse, quia cum à Christo capite & sponso suo, cui per fidem & Sacramenta conjungitur,

sanctificatur, tum à Spiritu sancto perpetuò gubernatur. Tertiò, eandem esse Catholicam, seu universalem, quia toto orbe diffusa, Christi fideles omnes omnium temporum comprehendit. Quartò & postremò, in hac ipsa Ecclesia Communionem esse Sanctorum, puta non eorum solùm qui in terris credentes peregrinantur; verùm etiam qui carnis mortalitate exuti, vel regnant in cœlo, vel illic regnaturi, in igne purgatorio suorum peccatorum sordibus expiantur. Qui quidem veluti unius corporis membra se invicem juvant mutuis officiis, meritis, orationibus, & sacrosancti Missæ Sacrificiî, Sacramentorumque Ecclesiæ virtutem participant.

*Quid porrò decimas, Remissionem peccatorum?*

Offert præsentem Dei gratiam peccatoribus omnibus, ne quis de venia peccatorum suorum consequenda umquam desperet, modò in Ecclesia perseveret Catholica, & ritè ejusdem Sacramentis utatur.

*Quid autem undecimus, Carnis resur-  
rectionem?*

Mortuos omnes ad vitam excitandos  
asserit, & novissimum iudicii diem con-  
firmat: nam ante Christi tribunal in car-  
ne redivivi omnes apparebimus, ut re-  
cipiat unusquisque prout gessit in suo  
corpore, sive bonum, sive malum.

*Quid denum postremus, & vitam eter-  
nam?*

Fidei & virtutis Christianæ præmium  
beatam immortalitatem ostendit, ut cer-  
tò sciamus post hanc vitam superesse  
aliā longè diversā, verèque secu-  
ram, beatam, ac sempiternam, quæ  
credentibus & obtemperantibus Christo  
destinata sit.

*Quæ est summa omnium Symboli arti-  
culorum?*

Corde & ore confiteri Dominum  
Deum, quo nihil aut majus, aut sapien-  
tius, aut melius potest excogitari, eum  
& unum in essentia, seu natura divina,  
& trinum in personis esse, utpote Pa-

Patrem & Filium, & Spiritum sanctum; ita ut hi tres unum sint, unus, verus, æternus, immensus, & incomprehensibilis Deus: ex quo, per quem, & in quo sunt omnia. Pater est conditor universorum: Filius redemptor hominum: Spiritus sanctus Ecclesiæ seu Christi fidelium sanctificator & rector. Igitur huic sanctissimæ & individuæ Trinitati respondent Symboli tres partes præcipuæ. Prima, quæ de creatione est, Patri; secunda, quæ de redemptione, Filio; tertia, quæ de sanctificatione, Spiritui sancto accommodatur.

*Quid est Ecclesia?*

Est omnium Christi fidem atque doctrinam profitentium congregatio, quæ sub uno & summo post Christum capite & Pastore in terris gubernatur.

*Qui ab Ecclesia prorsus alieni sunt?*

Primum Judæi & infideles omnes atque à fide apostatæ: deinde hæretici, id est scilicet, qui cum baptizati sint, contra Catholicam fidem cum pertinacia tene-

tur errorem: præterea schismatici, qui à pace & unitate Catholica ipsi se segregant: postremò qui à communione Sanctorum, à participatione Sacramentorum, & ab Ecclesiæ suffragiis, divinisque officiis, per Ecclesiasticam potestatem legitimè excluduntur, unde & excommunicati dicuntur.

Qui omnes à Christi corpore, quod est Ecclesia, sejuncti & alieni sunt, proindeque spiritualis vitæ ac salutis expertes manent, Satanæ, mortique perpetuæ, nisi resipiscant, obnoxii. Ac vitandi quidem illi omnes Catholicis, sed in primis hæretici & schismatici, non minus quàm pestes quædam exitiales fugiendi ac execrandi sunt.

*Quæ demum est simplex, brevis & recta fidei regula, quâ Catholici ab hæreticis discernuntur.*

Ea est: Christi fidem atque Ecclesiæ auctoritatem integram profiteri: illudque ratum ac fixum tenere oportere, quod Ecclesiæ Catholicæ Pastores atque Do-



ctores credendum definierint. Cæterum  
 si quis Ecclesiam non audierit, sit tibi,  
 inquit Christus ipse, sicut Ethnicus &  
 Publicanus. Non enim habebit Deum  
 Patrem, qui Ecclesiam noluerit habere  
 matrem.

## C A P U T I I.

DE SPE, ET ORATIONE DOMINICA.

*Quid est Spes?*

**V**IRTUS est divinitus infusa, per  
 quam certa cum fiducia nostræ sa-  
 lutis, & æternæ vitæ bona expectantur.  
*Unde modum rectè sperandi & petendi  
 discimus?*

Ex Oratione Dominica, quam Chri-  
 stus ipse Dominus & Magister noster ore  
 suo sacrosancto tradidit & præscripsit.

*Recita per partes Orationem Dominicam.*

Pater noster, qui es in cœlis.

*Prima petitio.*

I. Sanctificetur nomen tuum.

2. Adveniat regnum tuum.
  3. Fiat voluntas tua, sicut in cœlo  
& in terra.
  4. Panem nostrum quotidianum da  
nobis hodie.
  5. Et dimitte nobis debita nostra, sicut  
& nos dimittimus debitoribus nostris.
  6. Et ne nos inducas in tentationem.
  7. Sed libera nos à malo, Amen.
- Quid sibi vult initium hujus Orationis,  
Pater noster, qui es in cœlis?*

Præfatiuncula est, quæ nos memores reddit summi beneficii, quo Deus Pater per Christum nos sibi in filios adoptivos & hæredes coöptavit. Atque hoc dulci Patris nomine provocamur, tum ad eum redamandum, tum ad precandum magna cum fiducia.

*Quid explicat prima petitio,  
Sanctificetur nomen tuum?*

Proborum filiorum justum & liberale desiderium: hi petunt semper & ubique in se aliisque promoveri cognitionem, timorem, honorem, amo-

## *Catechismus.*

15

rem & cultum æternæ majestatis, & quidquid demum ad summi optimique Patris gloriam spectat.

*Quid secunda petitione agimus,  
Aveniat regnum tuum?*

Petimus gloriam regni cœlestis æternæque felicitatis nobis donari, ut citò cum Christo in sempiternum regnemus.

*Quid tertia, Fiat voluntas tua?*

Petimus divinæ gratiæ nobis opem adesse, ut Patris voluntatem in terra, sicut Beati omnes in cœlo faciunt, sincerè, alacriter, & constanter adimpleamus.

*Quid quarta, Panem nostrum quotidianum da nobis hodie?*

Petimus suppeditari nobis quæ ad vitam sive corporis, sive animi fovendam & sustentandam spectant, ut victum & vestitum, verbum Dei, & Ecclesiæ Sacramenta.

*Quid quinta, Et dimitte nobis debita nostra?*

Petimus veniam ac remissionem pecc-

catorum, parati vicissim remittere, quod in nos alii peccaverint.

*Quid penultima, Et ne nos inducas in tentationem?*

Petimus in hac tanta vitæ imbecillitate divinâ virtute fulciri, atque adversus Mundum, Carnem, Dæmonemque defendi, ne quocumque modo tentationi succumbentes peccato consentiamus.

*Quid septima & postrema petitione, Sed libera nos à malo?*

Petimus Dei benignitatem, quâ ipse nos liberet & vindicet à miseria, tum corporis, tum animi, sive in hac vita quoad salutem nostrâ congruit, sive in futura. Et additur, Amen; hoc est fiat, sive fiet: ut spem desideriumque monstremus, accipiendi ea, quæ septem his petitionibus continentur.

*Quæ summa est priorum Orationis hujus petitionum?*

Priores quatuor ostendunt quæ hîc bona sperare ac petere debeamus. Inter quæ primum

primum ac summum est divinæ Majestatis honor & gloria : proximum nostra felicitas ; huic accedit , Deo debita obedientia : postremum est , corporis animæque sustentatio necessaria Hæc summatim continentur prioribus quatuor. *Quæ summa est reliquarum petitionum?*

Tres posteriores continent mala quæ deprecari debeamus : ut sunt peccata , quæ nobis Dei regnum præcludunt ; tum tentationes , quæ nisi ope divina protegamur ; sua vi ad peccandum nos pertrahunt ; ac postremò hujus , ac futuræ vitæ calamitates. Docet igitur Dominica precatio simul & bona petere , & mala deprecari.

*Quomodo Salutationem Angelicam recitas Virgini Matri?*

Ave Maria , gratiâ plena , Dominus tecum , benedicta tu in mulieribus , & benedictus fructus ventris tui Jesus.

Sancta Maria , Mater Dei , ora pro nobis peccatoribus , nunc & in hora mortis nostræ , Amen.

*Unde hic modus Deiparam Virginem salutandi proflexit ?*

Primum ab exemplo Angeli Gabriëlis & Sanctæ Elisabethæ, deinde ex usu ipso & consensu Ecclesiæ Catholicæ.

*Quem verò fructum adfert hæc Salutatio?*

Sacro sanctæ Virginis & Dominicæ incarnationis gratiam, & æquè salutarem nobis reficit memoriam, ac prætereà monet, ut gratiosæ Virginis favorem, atque apud Deum intercessionem nobis conciliemus.

*Quid discimus ex hac Salutatione ?*

Eximias dotes ac laudes incomparabilis Virginis, ut quod Dei donis ac virtutibus amplissimis referta, quod eadem Virgo & Mater, quod inter omnes omnium temporum mulieres benedicta, quod Regis Regum Christi Dei & Domini nostri parens; ac proinde inventrix gratiæ, ac genitrix vitæ nobis existit.

## CAPUT III.

## DE CHARITATE ET DECALOGO.

*Quid est Charitas?*

**I**NFUSA à Deo virtus, quâ Deus propter se diligitur, proximus autem propter Deum.

*Quot sunt Charitatis præcepta?*

Duo principalia : diliges Dominum Deum tuum ex toto corde tuo, ex tota animâ tuâ, ex tota mente tua, & ex totis viribus tuis : hoc est primum & maximum mandatum. Secundum verò simile huic : Diliges proximum tuum sicut te ipsum. In his præceptis universa Lex pendet, & Prophetæ.

*Quo indicio se prodit Charitas erga Deum?*

Si ejus observes mandata. Hæc est enim Charitas Dei, ut mandata ejus custodiamus, & mandata ejus gravia non sunt. Et Christus ipse docet : Qui habet mandata mea, & servat ea ; ille est, qui diligit me.

*Quomodo se prodit & agnoscitur Charitas erga proximum?*

Charitas patiens est, benigna est, Charitas non æmulatur, non agit perperam, non inflatur, non est ambitiosa, non quærit quæ sua sunt, non irritatur, non cogitat malum, non gaudet super iniquitate, congaudet autem veritati, omnia suffert, omnia credit, omnia sperat, omnia sustinet.

*Cur præcepta Decalogi decem proponuntur?*

Etsi duo sint Charitatis præcepta, in quibus plenitudo Legis versatur, tamen præcepta Decalogi idcirco adjiciuntur, ut perspicuè magis omnes intelligant, quæ ad Charitatem tum Deo, tum proximo exhibendam pertinent.

*Quæ sunt præcepta Decalogi?*

1. Ego sum Dominus Deus tuus. Non habebis Deos alienos coram me. Non facies tibi sculptile, ut adores illud.

2. Non assumes nomen Domini Dei tui in vanum. Nec enim insontem ha-



bebit Dominus eum, qui assumpserit nomen Domini Dei sui frustra.

3. Memento ut diem Sabbati sanctifices.

4. Honora Patrem tuum, & Matrem tuam, ut sis longævus super terram, quam Dominus Deus tuus dabit tibi.

5. Non occides.

6. Non mœchaberis.

7. Non furtum facies.

8. Non loquêris contra proximum tuum falsum testimonium.

9. Non concupisces uxorem proximi tui.

10 Non domum, non agrum, non servum, non ancillam, non bovem, non asinum, nec universa, quæ illius sunt.  
*Quid sibi vult primum præceptum, Non habebis deos alienos?*

Prohibet ac damnat idololatriam, seu cultum falsorum deorum, artem magicam vel divinatoriam, observationes superstitiosas, omnem denique cultum impium: è diverso autem requirit, ut unum Deum optimum maximum credamus, colamus, & invocemus.

*Licetne Sanctos colere & invocare?*

Licet : non ad eum quidem modum, quo jubemur Deum colere & invocare, tamquam Creatorem & Redemptorem, & largitorem bonorum omnium ; at longè inferiori gradu, nimirum veluti dilectissimos Dei amicos, nostrosque apud ipsum intercessores & patronos.

*Huicne præcepto adversatur usus imaginum Christi, ac Sanctorum?*

Nequaquam : quia præcepto huic, Non facies tibi sculptile, causa mox additur, ut adores illud, videlicet Ethnicorum more, qui falsorum deorum statuunt simulachra, & idola sua impie colunt. Nos autem in imaginibus Christum & Sanctos, quos repræsentant, pio à majoribus tradito more veneramur. *Quid secundum prohibet, Non assumes nomen Domini Dei tui in vanum?*

Vetat abusum divini nominis, & irreverentiam, quæ committitur à perjuris, blasphemis per Deum, Sanctos, vel creaturam aliquam, absque gravi causa, veritate, ac reverentia jurantibus.

*Quid imperat tertium præceptum, Me-  
mento ut diem Sabbati sanctifices?*

Vult Sabbatum seu diem Festum in Ec-  
clesia piis operibus celebrari: quod fit  
adeundo templum, & audiendo Missam.

Laborare autem hoc tempore, & oc-  
cupationibus deditum esse servilibus  
planè interdicat.

*Quid injungit quartum, Honora Patrem  
& Matrem?*

Ut his, qui secundùm Deum vitæ no-  
stræ sunt auctores, reverentiam, obe-  
dientiam, opemque præstemus, ac omni  
demum officii genere illis ipsis satisfac-  
ciamus. Deinde jubet, ut Magistratus,  
cùm civiles, tum Ecclesiasticos paren-  
tum & majorum loco habeamus, illo-  
rum dicto lubentes pareamus, & reve-  
reamur potestatem atque auctoritatem.

*Qua ratione potestatem & auctoritatem  
Ecclesiasticam verebimur?*

Videlicet, si sacris & œcumenicis  
Conciliis, si receptis Apostolorum ac  
Patrum institutis ac decretis, si probatis

majorum consuetudinibus, denique si  
summæ Ecclesiæ pastoribus ac Pontifici-  
bus tribuerimus, quam singularem illis  
debemus observantiam, obedientiam-  
que. Ubi vel maximè peccant, qui cul-  
tum divinum & sanctiones ceremonias-  
que Ecclesiasticas convellunt, atque  
contemerant: tum qui Synodis & Ponti-  
ficibus obtreçant, ac in Sacerdotum jura  
& templa involant, Sacra profanantes.

*Quid sibi vult quintum præceptum,  
Non occides?*

Prohibet vim externam, cædem, &  
injuriam omnem, quæ corpori & vitæ  
proximi adferri possit. Ad hæc, iram,  
odium, rancorem, indignationem, &  
quosvis affectus ad proximi læsionem,  
quovis modo spectantes excludit, & pe-  
nitus refecat.

*Quid vetat sextum, Non Mæchaberis?*

Fornicationem, adulterium & obscæ-  
nos, illegitimosque concubitus, tum  
quidquid honestati, verecundiæ & inge-  
nuo pudori adversatur. Nam & qui vi-

derit mulierem ad concupiscendam eam, jam mœchatus est in corde suo.

*Quid præcepto septimo cavetur, Non furtum facies?*

Omnis rei alienæ illicita contractatio & usurpatio: ut sit in furto, rapina, usura, lucris injustis, dolis malis, & iniquis contractibus, demum quibusvis commutationibus & distributionibus, quibus Christiana charitas læditur, & proximus circumvenitur.

*Quid in octavo agitur, Non loquēris contra proximum tuum falsum testimonium?*

Interdicitur testimonium falsum, mendacium, & omnis linguæ contra proximum abusus, ut est in susurronibus, detractoribus, maledicis, adulatoribus, mendacibus, ac perjuris.

*Quid postrema duo præcepta, Non concupisces uxorem nec rem proximi?*

Vetant concupiscentiam uxoris ac rei alienæ: quoniam quod alienum est, haud solum injustè & pro libidine nostra oc-

cupare non licet, sed ne voluntate quidem ad illud appetendum ferri debemus, ita ut nostris rebus contenti, absque omni invidia, æmulatione, & cupiditate vivamus.

*Quæ summa, quisve finis præceptorum Decalogi?*

Nimirum ut Deus & proximus sincere diligantur: cujus rei Symbolum fuit in duas tabulas Decalogi à Deo facta distinctio. In priorē quidē tabula tria docentur, quæ ad charitatem Dei: in secunda verò septem, quæ ad dilectionem proximi spectant, explicantur.

*Qua ratione præcepta primæ tabulæ Charitatem Dei edocent?*

Quoniam tollunt & prohibent vitia cultui honorique Dei maximè contraria, idololatriam, apostasiam, hæresim, perjurium, superstitiones; admonent autem verum purumque Dei cultum corde, ore ac opere fideliter exhibendum esse, quod ubi fit, utique solus verus Deus cultu latriæ colitur & adoratur.

*Quomodo præcepta secundæ tabulæ Charitatem proximi explicant?*

Eo ipso, quod nostrum erga proximum Officium ordine complectuntur: videlicet ut non solum majores honoremus, sed etiam opere, verbis ac voluntate prodesse omnibus, & nocere nemini studeamus, siue corpus proximi, siue persona juncta conjugio, siue bona fortunæ considerentur.

*Quæ summa est præceptorum de proximo diligendo?*

Hæc ipsa nimirum; quod tibi non vis fieri, alteri ne feceris. Omnia verò quæcumque vultis ut faciant vobis homines, & vos facite illis. Hæc est enim Lex & Prophetæ.

*Suntne præter Decalogum alia præcepta?*

Sunt utique, nec solum utiliter illa, verum etiam necessariò observanda, præsertim Ecclesiæ præcepta, cui veluti Sanctissimæ Matri, sponsæque Christi aures & mentes præbere Catholici filii omnes debemus.

*Quæ sunt præcepta Ecclesiæ ?*

Præcipua quinque numerantur.

1. Statutos Ecclesiæ festos dies celebrato.

2. Sacrum Missæ officium diebus festis reverenter audito.

3. Indicta certis diebus jejunia , & à quibusdam cibis abstinentiam observato.

4. Peccata tua Sacerdoti proprio , aut alteri cum ejus facultate , singulis annis confitetur.

5. Sacrosanctam Eucharistiam ut minimum semel in anno , idque circa festum Paschæ sumito.

*Quem fructum adfert observatio præceptorum ?*

Hæc atque id genus alia Ecclesiæ tum instituta , tum præcepta , primùm fidem , humilitatem , & obedientiam Christianam exercent : deinde cultum divinum , honestam disciplinam , & publicam tranquillitatem alunt , conservant , & ornant , eoque mirificè conferunt , ut decenter & ordine cuncta in Ecclesia peragantur ,



præterquam quod æternam vitam mere-  
remur, si illa ex charitate observemus.

---

## C A P U T I V.

### DE SACRAMENTIS.

*Quid est Sacramentum ?*

**E**ST invisibilis gratiæ signum visibi-  
bile ad nostram sanctificationem di-  
vinitus institutum. Aliud est enim quod  
in Sacramento videmus, aliud quod in  
eo accipimus: signum videmus exter-  
num, occultam verò & Spiritualem  
gratiam, quæ res dicitur Sacramenti,  
accipimus.

*Quot sunt Sacramenta ?*

Septem, quæ à Christo Domino in-  
stituta, ab Apostolis tradita, & in Ec-  
clesia Catholica semper conservata, ad  
nos usque pervenerunt. Sunt autem  
hæc: Baptismus, Confirmatio, Euchar-

ristia, Pœnitentia, Extrema Unctio,  
Ordo, Matrimonium.

*Quare Sacramenta veneranda, & sum-  
mo in pretio habenda sunt?*

Primùm quidem, quia à Deo & Chri-  
sto Domino in Lege nova instituta: de-  
inde, quia gratiam Dei nobis necessa-  
riam eamque uberrimam non modò  
significant, verùm etiam seu vasa quæ-  
dam sacra divini Spiritûs continent, &  
ritè suscipientibus conferunt; ad hæc,  
quoniam adversus peccatum præsentis-  
sima sunt remedia, seu divina medica-  
menta nostri Samaritani: postremò quia  
bonis gratiam habentibus, eam ipsam  
conservant, augent, & amplificant.

*Cur Sacramentis ceremoniæ solennes &  
Ecclesiasticæ adhibentur?*

Multis profectò & gravibus de cau-  
sis. Primùm, ut Sacramentorum admi-  
nistrationem spectantes, admoneantur  
nihil hîc profanum, sed arcana quædam  
& divinis plena mysteriis geri, quæ sin-  
gularem reverentiam exigant. Deinde

ut ad Sacramenta ipsa accedentibus cultum promoveant interiorem, quem Deus præcipuè postulat, & cujus veluti signa, testimonia, & exercitia sint ceremoniæ: Præterea, ut Sacramenta ministrantes majori cum dignitate & fructu munus suum obeant, dum veteris Ecclesiæ institutis, Sanctorumque Patrum vestigiis fideliter inhærent: constat etenim hujusmodi cæremonias pleraque inde à temporibus Apostolorum per continuam successionem ad nos usque in Ecclesia perseverasse. His demum retinetur honesta religiosaque disciplina, his fovetur publica tranquillitas, quæ sæpè rituum externorum, aut immutatione, aut innovatione graviter interturbatur.

*Quid est Baptismus?*

Primum maximèque necessarium Legis novæ Sacramentum, quod semel in aqua confertur, quo spiritualiter renascimur, & peccatorum plena remissione percepta, in filios Dei adopta-

mur, hæredesque vitæ cœlestis adscribimur.

*Quid est Confirmatio ?*

Est Baptizatis collatum ab Episcopo Sacramentum, in quo per sanctum Chrisma & verba sacrosancta confertur gratia, & robur spiritûs additur, tum ad firmiter credendum, tum ad nomen Domini, quando sic est opus, liberè confitendum.

*Quid est Eucharistia ?*

Est Sacramentum, quo verum Christi Corpus atque Sanguis sub singulis speciebus panis & vini continetur; nobis, ut offeratur, adoretur, atque sumatur, relictum.

*Quot sunt præcipua de Eucharistiæ Doctrina capita scitu necessaria ?*

Quinque; primum est ejus veritas: Alterum est panis & vini in Christi corpus & sanguinem conversio. Tertium, adoratio debita. Quartum, ejus oblatio. Quintum & postremum ejusdem Sacramenti sumptio.

*Que*

*Quæ est veritas Sacramenti Eucharistiæ?*

Nimirum hæc, Christum verum Deum ac hominem verè ac integrè in hoc Sacramento contineri; & nobis adesse, ubi Sacerdos ritè ordinatus panem & vinum verbis illis arcanis, & à Christo traditis, consecravit.

*Quæ fit conversio per verba illa, quibus hoc Sacramentum Sacerdos consecrat?*

Ea, ut per ipsa verba, operante Christo, panis & vinum in corpus & sanguinem Dominicum convertantur, ac transsubstantientur, atque ita panis & vinum esse desinant in Eucharistia.

*Quæ Sacramento huic debetur adoratio?*

Eadem sanè quæ Christo Domino ac æterno Deo debetur, quippe quem illic presentem agnoscimus. Ideoque religioso cùm corporis, tum animi cultu, ut par est, hoc Sacramentum supplices veneramur.

*Quare censetur hoc Sacramentum oblatio?*

Quia est Legis novæ sacrificium, & oblatio munda cruentis Legis Judaicæ

sacrificiis incruenta succedens, quæ pro vivis ac defunctis Christi fidelibus in Missa offertur ac celebratur. Unde fit ut Eucharistia non solum à fidei populo sumatur, sed etiam pro peccatis à Sacerdotibus ad Dominicæ passionis ac mortis continuam commemorationem quotidie immoletur, semperque oblata fuerit in Ecclesia Dei.

*Quid in Sacramenti hujus sumptione servandum ?*

Quod fides & auctoritas sanctæ Matris Ecclesiæ docet ; videlicet, Christiano laïco sat esse, sub una specie panis totum Christum accipere, & hac sumptione consequi, ut qui non indignè accesserit, ingentem Dei gratiam ac æternam quoque vitam obtineat, qui verus ac integer Sacramenti hujus fructus existit ; eoque fit efficacior, quò sæpius sacra & salutaris illa communio dignè iteratur.

*Quid est Pœnitentia ?*

*Est secunda post naufragium tabula,*

& necessarium relapsis Sacramentum, in quo remissio peccatorum & à reis petitur, & à Sacerdotibus tribuitur.

*Quot sunt partes & actiones Pœnitentiæ?*

Tres: contritio, vel dolor animi, peccata sua detestantis, & ad vitam meliorem adspirantis: Confessio, seu peccatorum suorum coram Sacerdote facta explicatio: & satisfactio denique, seu vindicta punitioque criminum de se ipso sumpta, ad præstandos fructus dignos Pœnitentiæ.

*Quid est Extrema Unctio?*

Est Sacramentum, quo ægroti per oleum sacrum, & verba Christi in magnis morbi molestiis relevantur, ut felicius ex hoc mundo demigrent, & corpora etiam, si ita expedit, sanitati restituantur.

*Quid est Ordo?*

Est Sacramentum, quo Sacerdotibus, aliisque Ministris Ecclesiæ potestas confertur ad Ecclesiastica munia ritè decenterque obeunda.

*Quid postremò est Matrimonium?*

Sacramentum, quo vir & mulier le-

gitimè contrahentes, individuum vitæ societatem ineunt, gratiâque divinâ donantur; tum ut soboles honestè & Christianè suscipiatur, ac educetur; tum ut foedæ libidinis, & incontinentiæ peccatum evitetur.

*Estne inter Sacramenta discrimen?*

Est sanè: Baptismus enim, Confirmatio, & Ordo, semel collata numquam iterantur, sicuti cætera. Idem Baptismus necessariò suscipitur ab omnibus, Eucharistia à ratione utentibus, & à relapsis Pœnitentia. Arbitrarium est autem uti reliquis, modò nullum contemnas, aut, cùm illud sumendi tempus est, negligas.

---

## C A P U T V.

De officiis Justitiæ Christianæ.

*Quot sunt officia Justitiæ Christianæ?*

**H**ÆC duo: declina à malo sive peccato, & fac bonum sive officium Justitiæ.



*Qui potest homo cavere peccatum, & bonum facere seu præstare Justitiam?*

Non id per se quidem, sed Christi gratiâ ac Spiritu, instructus Christianus potest, ac debet, quantum hujus quidem vitæ status admittit, justè vivere, & legem implere.

*Quotuplex est peccatum?*

Duplex: Originale & Actuale.

*Quid est Originale?*

Quod ab ortu nobis congenitum per Baptismum in Christo condonatur.

*Quid est actuale?*

Dictum, factum, vel concupitum contra vel præter legem Dei aut Ecclesiæ.

*Quotuplex est actuale?*

Duplex: Mortale, sic dictum, quia mortem animæ præsentem adfert: (Anima enim quæ peccaverit, ipsa morietur) & Veniale, ut cui venia facilè tribuitur: & sine quo ne justī quidem vivunt.

*Quibus gradibus ad peccatum deducimur?*

His tribus: Suggestione, delectatione, consensu, seu deliberatâ voluntate peccandi.

*Qui sunt supremi gradus peccantium?*

Eorum qui scientes ac prudentes ex mera peccant malitia: qui etiam de peccato ipso gloriantur: & qui benè morientibus obstrepunt, ac salutaria consilia prorsus contemnunt.

*Quare peccatum fugiendum?*

Quia Dominum Deum offendit, summum bonum eripit, & summum adfert malum peccanti, dum divinam tollit fruitionem numquam recuperandam, & poenas ærumnasque homini accersit sempiternas.

*Quæ dicuntur peccata Capitalia?*

Illæ ex quibus veluti capitibus & fontibus, omnia alia peccata proficiuntur.

*Quot sunt peccata Capitalia?*

Septem: Superbia, Avaritia, Luxuria, Invidia, Gula, Ira, Acedia.

*Qua ratione vitari & vinci hæc peccata possunt?*

Si Jesu Christi gratiæ coöperemur, peccatorum damna & pericula considerantes, & virtutes septem his peccatis contrarias exercentes.

*Quæ virtutes peccatis Capitalibus adversantur?*

Hæ septem: Humilitas, Largitas, Castitas, Benignitas, Temperantia, Patientia, Devotio, seu sedula Pietas.

*Quæ peccata in Spiritum Sanctum committi dicuntur?*

Ea, quæ suâ malitiâ sic divinam excludunt gratiam, ut neque in hoc sæculo, nisi egrè admodum, neque in futuro remittantur.

*Quot sunt peccata in Spiritum Sanctum?*

Sex: præsumptio de misericordia Dei, vel de impunitate peccati, Desperatio, Agnitæ veritatis impugnatio; Fraternæ charitatis invidentia, Obstinatio, & impœnitentia.

*Quæ peccata in Cælum clamare dicuntur?*

Quæ per se vehementer abominanda sunt, & apertè humanæ Charitatis jura violant, unde vindictam clamare perhibentur, & horrendis sæpè modis in hac vita divinitus vindicantur.

*Quot sunt peccata in Cœlum clamantia?*

Hæc quatuor : Homicidium voluntarium, peccatum Sodomiticum, oppressio pauperum, viduarum, atque pupillorum, demum merces operariorum defraudata.

*Quæ peccata dicuntur aliena ?*

Ea, quæ ab aliis quidem committuntur, sed nobis interim auctoribus, vel quoquo modo adjutoribus, aut saltem non impredientibus, ut idcirco nobis etiam imputentur.

*Quot modis aliena peccata nobis imputantur ?*

Novem his modis : consilio, jussione, consensu, irritatione, laudatione seu adulatione, reticentiâ culpæ alienæ, conniventiâ vel indulgentiâ, rei alienæ participatione, & prava facti alieni defensione.

*Quæ dicuntur opera carnis ?*

Ea quæ homines secundum carnem viventes, & à Dei filiis spiritualibus degenerantes, committere solent.

*Quæ sunt opera carnis?*

Paulus ea recenset in hunc modum: Manifesta sunt opera carnis, quæ sunt, Fornicatio, immunditia, impudicitia, luxuria, idolorum servitus, veneficia, inimicitia, contentiones, æmulationes, rixæ, dissensiones, sectæ, invidia, homicidia, ebrietates, commessiones & his similia quæ prædico vobis, sicut prædixi: quoniam, qui talia agunt, regnum Dei non consequentur.

*Estne satis Christiano malum fugere & à peccato declinare?*

Nequaquam: sed præterea bonum agere & virtutes exercere necesse est. Alioqui scienti bonum, & non facienti, peccatum est illi.

*Quid boni faciendum est Christiano?*

In genere quidem quidquid boni lex naturalis, divina, vel humana præcipit vel ostendit, in specie verò pro sua quisque vocatione præstare officium, & acceptæ Dei gratiæ coöperari cum gratiarum actione debet. Omnis enim

arbor, quæ non facit fructum bonum, excidetur, & in ignem mittetur.

*Quæ sunt præcipua bonorum operum genera?*

Ea quibus sobriè, justè, pièque vivitur in hoc sæculo, & per quæ itidem justî magis magisque justificantur, & sancti indies sanctificantur.

*Quotuplicia sunt hæc operum bonorum genera?*

Triplicia: utpote Jejunium, Eleëmofyna seu misericordia, & Oratio, de quibus ita legimus: bona est Oratio cum Jejunio & Eleëmofyna.

*Quid est fructus bonorum operum?*

Habent ea promissionem ac mercedem hujus ac æternæ vitæ; Deum placant, gratiam conservant, & augent; denique Christiani hominis vocationem certam faciunt atque consummant.

*Quid est Jejunium?*

Est certis diebus, juxta morem & præscriptum Ecclesiæ, carnibus abstinere, & saltem unica cibi refectio in-

die contentum vivere frugaliùs. Sed si generatim hoc nomen accipias, Jejunium est corporis quædam castigatio piè suscepta, ut vel caro spiritui subji- ciatur, vel obedientia exerceatur, vel Dei gratia impetretur.

*Quid est Oratio ?*

Est mentis in Deum elevatio, per quam vel mala deprecamur, vel bona nobis aliisque petimus, vel Deo benedicimus.

*Quid est Eleēmosyna seu Misericordia ?*

Est beneficium, quo alterius miseriæ ex commiserationis affectu subvenimus.

*Quotuplex genus est Eleēmosynæ seu Misericordiæ ?*

Duplex; alia quippe sunt opera Misericordiæ corporalia, alia verò spiritua- lia: quoniam vel ad corporalem, vel ad spiritualem miseriam proximi suble- vandam spectant.

*Quot sunt opera Misericordiæ corporalia ?*

Septem, Esurientes pascere, potum dare sitientibus, operire nudos, captivos

redimere, ægrotos invifere, hofpitio peregrinos fufcipere, mortuos fepelire.

*Quot funt opera Mifericordiae fpiritualia?*

Sunt & ipfa feptem: uti, peccantes corrigere, ignorantes docere, dubitantibus rectè confulere, pro falute proximi Deum orare, confolari mœftos, ferre patienter injurias, offenfam remittere.

*Quæ funt virtutes omnium præcipuæ?*

Post Theologicas quidem illas, de quibus dictum eft, Fidem & Spem, & Charitatem, præcipuæ funt Cardinales, quæ Chriftianos cum primis decent.

*Quæ dicuntur Cardinales virtutes?*

Quæ tamquàm fontes aliarum & cardines omnem honeftæ vitæ rationem continent.

*Quot funt virtutes Cardinales?*

Quatuor, Prudentia, Juftitia, Temperantia, Fortitudo: quibus in Chrifto confequitur homo, ut providè, juftè, temperatè, ac fortiter in omni vita degat, ac placeat Deo.



*Quæ dicuntur dona Spiritus Sancti?*

Septem illa quæ super Christum requievit Propheta testatur, & quæ ab ipso, ceu fonte omnis gratiæ in alios derivantur: ut donum sapientiæ, donum intellectûs, consilii, scientiæ, fortitudinis, pietatis, ac timoris Domini.

*Quanam illa, quæ fructus Spiritûs vocantur?*

Ea quæ pii secundum spiritum viventes operantur, & per quæ spirituales à carnalibus dignoscuntur.

*Qui sunt fructus Spiritûs?*

A Paulo Apostolo sic numerantur: Charitas, Gaudium, Pax, Patientia, Longanimitas, Bonitas, Benignitas, Mansuetudo, Fides, Modestia, Continentia, Castitas.

*Quæ dicuntur beatitudines Evangelicæ?*

Illæ propter quas in Evangelio etiam hi, qui miseri prorsus ac infelices videntur, beati ac felices pronuntiantur.

*Quot sunt Evangelicæ beatitudines?*

Octo, quas ita Christus in monte tradidit.

1. Beati pauperes spiritu, quoniam ipsorum est regnum cœlorum.

2. Beati mites, quoniam ipsi possidebunt terram.

3. Beati qui lugent, quoniam ipsi consolabuntur.

4. Beati qui esuriunt & sitiunt justitiam, quoniam ipsi saturabuntur.

5. Beati misericordes, quoniam ipsi misericordiam consequentur.

6. Beati mundo corde, quoniam ipsi Deum videbunt.

7. Beati pacifici, quoniam Filii Dei vocabuntur.

8. Beati qui persecutionem patiuntur propter justitiam, quoniam ipsorum est regnum cœlorum.

*Quæ dicuntur Evangelica consilia?*

Videlicet, quæ per Evangelium non tamquam ad salutem necessaria, sed veluti suscipientibus magis expedita atque utilia, à Christo non præcipiente quidem, sed consulente proponuntur.

*Quot sunt Evangelica consilia ?*

Principalia tria sunt: nimirum, Paupertas voluntaria, Castitas perpetua, & Obedientia integra, quæ propter Deum homini religiosè exhibetur.

*Quæ hominis novissima dicuntur ?*

Ea quæ hominī ad extremum accidunt; ut Mors, Judiciū, infernus, & Cœlestis gloria, de quibus ita docet Sapiens: In omnibus operibus tuis memorare novissima tua, & in æternum non peccabis.

**FINIS.**



# TESTIMONIA

## S. SCRIPTURÆ,

Contra Hæreticos in promptu semper habenda.

**S**I difficile & ambiguum apud te iudicium esse perspexeris inter sanguinem & sanguinem, causam & causam, lepram & lepram: & iudicium intra portas tuas videris verba variari, surge & ascende ad locum quem elegerit Dominus Deus tuus, veniesque ad Sacerdotes Levitici generis, & ad iudicem qui fuerit illo tempore, quæresque ab eis qui indicabunt tibi iudicii veritatem, & facies quodcumque dixerint, qui præsumt loco quem elegerit Dominus, & docuerint te juxta legem ejus, sequerisque sententiam eorum: nec declinabis ad dexteram, neque ad sinistram. *Deut.*

17.

Qui superbierit nolens obedire Sacerdotis

dotis imperio, qui eo tempore ministrat Domino Deo tuo, & decreto judicis, morietur homo ille, & auferes malum de Israël, cunctusque populus audiens timebit, ut nullus deinceps intumescat superbia. *Ibid.*

Interroga patrem tuum, & annuntiabit tibi majores tuos & dicent tibi. *Deut.* 23.

Hæc dicit Dominus: State super vias, & videte, & interrogate de semitis antiquis, quæ sit via bona, & ambulate in ea: & inuenietis refrigerium animabus vestris. *Jerem.* 6.

Labia Sacerdotis custodiunt scientiam, & legem requirent ex ore ejus, quia Angelus Domini exercituum est. *Malach.* 2.

Audi fili mi disciplinam patris tui, & ne dimittas legem matris tuæ, ut adatur gratia capiti tuo, & torques collo tuo. *Prov.* 1.

Conserva fili mi, precepta patris tui, & ne dimittas legem matris tuæ: liga

eam in corde tuo jugiter, & circumda  
gutturum tuo. *Prov. 6.*

Ne transgrediaris terminos antiquos  
quos posuerunt patres tui. *Prov. 22.*

Non te prætereant narratio seniorum:  
ipsi enim didicerunt à patribus suis. Ab  
ipsis discas intellectum, & in tempore  
necessitatis dare responsum. *Eccl. 8.*

Videte ne quis vos seducat: surgent  
enim multi pseudo-Prophetæ, & sedu-  
cent multos. Tunc si quis vobis dixe-  
rit: Ecce hic est Christus, aut il-  
lic: nolite credere: & quoniam abun-  
dabit iniquitas, refrigescet charitas mul-  
torum. Qui autem perseveraverit usque  
in finem hic salvus erit. Si ergo dixe-  
rint vobis: Ecce in deserto est, nolite  
exire: Ecce in penetralibus, nolite cre-  
dere. *Matt. 24.*

Qui vos audit, me audit; qui vos  
spernit, me spernit; qui autem me sper-  
nit, spernit eum, qui misit me. *Luc.*

10.

Omnia ergo quaecumque dixerint vo-

his, servate & facite: secundum opera  
verò illorum nolite facere: Dicunt enim,  
& non faciunt. *Matt. 23.*

Et ego dico tibi, quia tu es Petrus &  
super hanc Petram ædificabo Ecclesiam  
meam & portæ inferi non prævalebunt  
adversus eam. Et tibi dabo claves regni  
cœlorum: & quodcumque ligaveris su-  
per terram, erit ligatum & in cœlis; &  
quodcumque solveris super terram, erit  
solutum & in cœlis. *Matt. 16.*

Simon, ecce Satanas expetivit vos,  
ut cribaret sicut triticum: ego autem ro-  
gavi pro te, ut non deficiat fides tua.  
*Luce. 22.*

Simon Joannis diligis me? pasce ag-  
nos meos, pasce oves meas. *Joan. 21.*

Et ecce ego vobiscum sum omnibus  
diebus usque ad consummationem sæ-  
culi. *Matt. 28.*

Ego rogabo Patrem, & alium para-  
clitum dabit vobis, ut maneat vobiscum  
in æternum, Spiritum veritatis, quem  
mundus non potest accipere, quia non

videt eum, nec scit eum, vos autem cognoscetis eum. *Joan.* 14.

Non relinquam vos orphanos, veniam ad vos; Paraclitus autem Spiritus Sanctus, quem mittet Pater in nomine meo, ille vos docebit omnia, & suggeret vobis omnia, quæcumque dixerò vobis. *Ibidem.*

Adhuc multa habeo vobis dicere, sed non potestis portare modò. Cùm autem venerit ille Spiritus veritatis, docebit vos omnem veritatem. *Joan.* 16.

Non pro eis rogo tantùm, sed & pro eis qui credituri sunt per verbum eorum in me; ut omnes unum sint, sicut tu, Pater in me, & ego in te, & ipsi in nobis unum sint. *Joan.* 17.

Siautem Ecclesiam non audierit, sit tibi sicut ethnicus & publicanus. *Matt.* 18.

Fuerunt verò & pseudoprophetæ in populo; sicut & in vobis erunt magistri mendaces, qui introducent sectas perditionis. Et multi sequenter eorum luxu-



rias, per quos via veritatis blasphema-  
bitur: qui in errore conversantur, liber-  
tatem illis promittentes, cum ipsi servi  
sint corruptionis. 2. *Petr.* 2.

Hoc primum scientes, quod venient  
in novissimis diebus in deceptione illu-  
sores; juxta proprias concupiscentias  
ambulantes. 2. *Petr.* 3.

Hoc est mandatum, ut quem admo-  
dum audivistis ab initio, in eo ambule-  
tis: quoniam multi seductores exierunt  
in mundum. . . Omnis qui recedit &  
non permanet in doctrina Christi, Deum  
non habet. *Joan.* 2.

Si quis venit ad vos & hanc doctri-  
nam non adfert, nolite recipere eum  
in domum, nec Ave ei dixeritis. *Ibidem.*

Erit tempus cum sanam doctrinam  
non sustinebunt, sed ad sua desideria  
eoacervabunt, sibi magistros prurien-  
tes auribus. 2. *Timot.* 4.

Rogo autem vos fratres, ut observe-  
tis eos qui dissensiones & offendicula  
præter doctrinam, quam vos didicistis,

faciunt: & declinate ab illis. Hujusmodi enim Christo Domino non serviunt, sed suo ventri, & per dulces sermones & benedictiones seducunt corda innocentium. *Rom. 16.*

Denuntiamus autem vobis fratres in nomine Domini nostri Jesu Christi, ut subtrahatis vos ab omni fratre ambulante inordinatè & non secundum traditionem quam acceperunt à nobis. 2. *Thess. 3.*

Itaque fratres stete & tenete traditiones, quas didicistis, sive per sermonem, sive per Epistolam nostram. 2. *Thess. 2.*

Oportet hæreses esse, ut & qui probati sunt, manifesti fiant in vobis. 1. *Cor. 1.*

Hæreticum hominem post unam & secundam correptionem evita, sciens quia subversus est; qui ejusmodi est & delinquit, cum sit proprio judicio condemnatus. *Tit. 3.*

Si quis videtur contentiosus esse, nos talem consuetudinem non habemus, neque Ecclesia Dei. 1. *Cor. 11.*

Hæc tibi scribo, ut scias quomodo oporteat te in domo Dei conversari, quæ est Ecclesia Dei vivi, columna & firmamentum veritatis. 1. *Tim.* 3.

Doctrinis variis & peregrinis nolite abduci. Obedite præpositis vestris & subiacete eis. *Heb.* 13.

O Timothee depositum custodi, devitans profanas vocum novitates & oppositiones falsi nominis scientiæ, quam quidam promittentes, circa fidem exciderunt. 1. *Tim.* 6.

Miror quod sic tam citò transferimini ab eo, qui vos vocavit in gratiam Christi, in aliud Evangelium: quod non est aliud, nisi sunt aliqui qui vos conturbant & volunt convertere Evangelium Christi. Sed licet nos, aut Angelus de cœlo Evangelizet vobis, præterquam quod Evangelizavimus vobis, anathema sit. *Galat.* 1.

Vos autem charissimi, memores estote verborum, quæ prædicta sunt ab Apostolis Domini nostri JESU Christi,

qui dicebant vobis quoniam in novissimis temporibus venient illusores secundum desideria sua ambulantes in impietatibus. Hi sunt qui segregant semetipsos, animales, Spiritum non habentes. Hi sunt murmuratores querelosi, secundum desideria sua ambulantes, & os eorum loquitur superbiam. *Jud. Ap.*

*B. Augustini sententia tres, notata dignissima.*

Lib. de fide ad Petrum.

I. **F**irmissime tene & nullatenus dubites non solum omnes Paganos, sed etiam Judæos, hæreticos, atque schismaticos, qui extra Ecclesiam Catholicam præsentem finiunt vitam, in ignem æternum ituros, qui paratus est diabolo & Angelis ejus.

II. Firmissime tene & nullatenus dubites quemlibet hæreticum, five schismaticum in nomine Patris & Filii, & Spiritus Sancti baptizatum, si Ecclesiæ Catholicæ non fuerit aggregatus, quantascumque eleëmofynas fecerit; etsi pro

Christi nomine etiam sanguinem fuderit, nullatenus posse salvari. Omni enim homini, qui Ecclesiæ Catholicæ non tenet unitatem, neque baptismus, atque eleëmofyna quamlibet copiosa, neque mors pro nomine Christi suscepta proficere potest ad salutem, quamdiu in eo hæretica vel schismatica pravitas perseverat, quæ ducit ad mortem.

III. Firmissimè tene, & nullatenus dubites, non omnes qui intra Ecclesiam Catholicam baptizantur, accepturos esse vitam æternam, sed eos qui percepto baptismo rectè vivunt, id est, qui abstinuerunt se à vitiis & concupiscentiis carnis. Regnum enim cœlorum sicut infideles, hæretici atque schismatici non habebunt, sic Catholici criminosi possidere non poterunt.

*Sit nomen Domini Benedictum in  
secula. Amen.*

# DE ÆTERNA SAPIENTIA PRECES HORA-

RIÆ, ante annos CC. ab Henrico  
Susone Ordinis Prædicatorum con-  
scriptæ, quas consultissimum foret  
studiosis adolescentibus quotidie lege-  
re: ut à Christo, qui est fons Sapien-  
tiæ & Sapiencia ipsa, veræ sapientiæ  
ac perspicacis intelligentiæ lucem &  
gratiam obtineant; sine qua omnis  
scientia nedum vana, sed etiam pern-  
ciosa est.

*Salutatio matutina ad æternam  
Sapientiam.*

**A** Nima mea desideravit te in nocte,  
sed & spiritu meo in præcordiis meis  
de manè evigilavi ad te, O præclarissima  
Sapientia, petens, ut desiderata præsen-  
tia tua cuncta nobis adversantia remo-  
veat, penetralia cordis nostri tua multi-  
formis gratia perfundat, & in amore tuo  
vehementer accendat. Et nunc dulcissi-  
me Domine JESU Christe, ad te di-

luculò confurgo, teque ex intimo cordis affectu saluto. Millia quoque millium cœlestium agminum tibi ministrantium te ex me saluent, ac decies millies centena millia tibi assistentium te ex me glorificent. Universalis etiam harmonia omnium creaturarum te ex me collaudet, ac nomen tuum gloriosum, protectionis nostræ clypeum, benedicat in læcula. Amen.

## SINGULIS HORIS

*Premittur hic versiculus.*

Salutem mentis & corporis donet nobis JESUS Sapiencia Patris.

*Ad Matutinum.*

**D**OMINE labia mea aperies. Et os meum annuntiabit laudem tuam.

Deus in adjutorium meum intende.

Domine ad adjuvandum me festina.  
Gloria Patri, & Filio, &c. Sicut erat,  
&c. Amen. Alleluia.

*A Septuagesima usque ad Pascha dicitur.*

Laus tibi Domine, Rex æternæ gloriæ.

Æternæ Sapientiæ fontem adoremus.  
Et pro gloria nominis ejus jubilemus.

*Psalms. XCIV.*

**V**ENITE exulemus Domino, jubilemus Deo salutari nostro, præoccupemus faciem ejus in confessione, & in Psalmis jubilemus ei.

Æternæ Sapientiæ fontem adoremus.  
Et pro gloria nominis ejus jubilemus.

Quoniam Deus magnus Dominus, & Rex magnus super omnes Deos, quoniam non repellet Dominus plebem suam : quia in manu ejus sunt omnes fines terræ, & altitudines montium ipse conspicit. Et pro gloria nominis ejus jubilemus.

Quoniam ipsius est mare, & ipse fecit illud, & aridam fundaverunt manus ejus : venite adoremus, & procidamus ante Deum, ploremus coram Domino, qui fecit nos, quia ipse est Dominus Deus noster, nos autem populus ejus, & oves pascuæ ejus.



**Æternæ Sapientiæ fontem adoremus ,  
& pro gloria nominis ejus jubilemus.**

Hodie si vocem ejus audieritis , nolite  
obdurare corda vestra , sicut in exacer-  
batione secundum diem tentationis in  
deserto , ubi tentaverunt me patres ve-  
stri , probaverunt & viderunt opera mea.

**Et pro gloria nominis ejus jubilemus.**  
Quadraginta annis proximus fui ge-  
nerationi huic , & dixi , semper hi errant  
corde : ipsi verò non cognoverunt vias  
meas : quibus juravi in ira mea , si in-  
troibunt in requiem meam.

**Æternæ Sapientiæ fontem adoremus ,  
& pro gloria nominis ejus jubilemus.**  
Gloria Patri , & Filio , & Spiritui  
Sancto.

Sicut erat in principio , &c.  
**Et pro gloria nominis ejus jubilemus.**  
**Æternæ Sapientiæ fontem adoremus ,  
& pro gloria nominis ejus jubilemus.**

*Hymnus S. Bernardi.*

**J**ESU dulcis memoria dans vera cor-  
di gaudia : sed super mel & omnia ,  
ejus dulcis præsentia.

Nîl canitur suavius, auditur nîl jucundius, nîl cogitatur dulcius, quàm JESUS Dei Filius.

JESU spes poenitentibus, quàm pius es petentibus! quàm bonus te quærentibus! sed quid invenientibus?

Æterna Sapientia, tibi Patrique gloria, cum Spiritu Paraclito, in sempiterna sæcula, Amen.

*Psal. LXV.*

**J**UBILATE Deo omnis terra, Psalmum dicite nomini ejus: date gloriam laudi ejus.

Dicite Deo, quàm terribilia sunt opera tua Domine! in multitudine virtutis tuæ mentientur tibi inimici tui.

Omnis terra adoret te, & psallat tibi: Psalmum dicat nomini tuo.

Gloria Patri, & Filio, & Spiritui Sancto.

Sicut erat in principio: & nunc & semper: & in sæcula sæculorum. Am.

*Antiphona.*

Sapientia ædificavit sibi domum, ex-

eidit columnas septem, subdidit sibi gentes, superbiorum & sublimium colla propria virtute calcavit.

ψ. Ego autem in Domino gaudebo.

℞. Et exultabo in Deo JESU meo.

Pater noster, &c. Et ne nos inducas, &c.

Jube Domine benedicere.

JESUS Sapiencia Patris depellat cuncta adversantia nobis. Amen.

*Lectio Prima.*

**O** SAPIENTIA æterna splendor gloriæ, & figura substantiæ Patris, qui universa de nihilo creasti, & ut hominem ad Paradisi gaudia reduceres, in hanc vallem miseriæ descendisti, ei-que viam redeundi per tuam dulcissimam conversationem demonstrasti, & pro satisfactione cunctorum, tamquam agnus innocens Patri immolari voluisti; aperi per tuam pretiosam mortem cor meum: ut Regem regum, & Dominum dominantium oculis integræ fidei semper adspiciam. Pone meam in tuis vulneribus Philosophiam, in tuis stig-

matibus sapientiam, ut ulterius in te solo charitatis libro & morte tua proficiam, in omnibus mutabilibus rebus deficiam: ita ut ego jam non ego, sed tu in me, & ego in te, indissolubili vinculo amoris æternaliter maneamus. Tu autem Domine, miserere nostri: Deo gratias.

*R.* Emitte, Domine, Sapientiam de sede magnitudinis tuæ, ut mecum sit & mecum laboret: ut sciam quid acceptum sit coram te omni tempore.

*ψ.* Da mihi Domine, sedium tuarum assistricem Sapientiam: Ut sciam quid acceptum sit coram te omni tempore.

Jube Domine benedicere.

Æterna Sapientia illuminare dignetur sensus & corda nostra. Amen.

*Lectio secunda.*

**O** JESU mi dulcissime, & sapientia felicissima, verbum Patris, principium & finis omnium gentium: piis oculis, quæso, me intueri, qui pulvis sum & caro, sciens quod non sit volentis,

lentis, neque currentis, sed tui, Deus, miserentis. Recogita obsecro, amarissimam passionem, quam pro me indigno peccatore pertulisti, & bonam voluntatem à te inchoatam piè custodias. O misericordia mea, ne derelinquas me. O refugium meum: ne discefferis à me. O liberator meus, intende in adjutorium meum: & me huic mundo mortuum in sepulchro tuo tecum sepelias, ab omnibus inimicorum insidiis abscondas: ut me à te nec vita, nec mors, nec ulla fortunæ sors separet, sed permaneat morte fortior amor noster nunc & in ævum.

Tu autem Domine miserere nostri! Deo gratias.

R. Da mihi Domine, sedium tuarum assistricem Sapientiam & noli me reprobare à pueris tuis: Quoniam servus tuus sum ego, & filius ancillæ tuæ.

℣. Mitte illam à sede magnitudinis tuæ, ut mecum sit & mecum laboret. Quoniam servus tuus sum ego, & filius ancillæ tuæ.

E

Jube Domine benedicere.

Dono Sapientiæ & intellectus impleat  
nos Spiritus Sanctus. Amen.

*Lectio Tertia.*

**O** REFUGIUM meum, & libera-  
tor meus, per immensum amorem,  
qui te in patibulo crucis amarissimam  
mortem pro me subire coëgit, peccata,  
quæ ego immundus peccator commisi,  
misericorditer indulgeas: à committen-  
dis & à cunctis periculis in vulnere la-  
teris tui piè me custodias: gressus meos  
in hujus vitæ fluctibus ad sanctum fi-  
nem dirigas, & ad conspectum gloriæ  
tuæ me pervenire concedas.

Tu autem Domine miserere nostri.  
Deo gratias.

**R.** Super salutem & omnem pulchri-  
tudinem dilexi sapientiam & proposui  
pro luce habere illam: Venerunt autem  
mihi omnia bona pariter cum illa.

**V.** Dixi sapientiæ: Soror mea es: &  
prudentiam vocavi amicam meam: Ve-

nerunt autem mihi omnia bona pariter cum illa.

Gloria Patri, &c.

Venerunt autem mihi omnia bona pariter cum illa.

## EX CANTICO

*D. D. Ambrosii & Augustini.*

Tu Rex gloriæ Christe.

Tu Patris sempiternus es Filius.

Tu ad liberandum suscepturus hominem, non horruisti Virginis uterum.

Tu devicto mortis aculeo aperuisti credentibus regna cœlorum.

Tu ad dexteram Dei sedes in gloria Patris.

Judex crederis esse venturus.

Te ergo quæsumus, tuis famulis subveni, quos præcioso sanguine redemisti.

Æternâ fac cum sanctis tuis in gloria numerari.

Salvum fac populum tuum Domine, & benedic hæreditati tuæ.

Et rege eos, & extolle illos, usque in æternum.

Per singulos dies benedicimus te.

Et laudamus nomen tuum in sæculum, & in sæculum sæculi.

Dignare Domine, die isto sine peccato nos custodire.

\* Miserere nostri Domine, miserere nostri.

Fiat misericordia tua Domine, super nos; quæmadmodum speravimus in te.

In te Domine, speravi: non confundar in æternum. Amen.

**QUI TAMEN VOLET**

*Poterit hujus loco sequens  
Canticum legere.*

Te Christum laudamus.

Te JESUM benedicimus.

Te Regem regum, & Dominum dominantium confitemur.

Te crucifixum colimus dulcem & amabilem Redemptorem: Qui nos aspersione tui sanguinis redemisti. Dignus es Domine JESU, Deus noster, accipere laudem, benedictionem, gloriam & honorem. Exultet tibi omnis caro, &



omnis vivens glorificet nomen tuum.  
Humilietur omnis caro sacris sub pedi-  
bus tuis : & omnis creatura tua serviat  
tibi. Laudet & extollat te, benedicat te  
& glorificet in æternum.

*Ad Laudes.*

Salutem mentis & corporis donet no-  
bis Jesus Sapiencia Patris.

Deus in adjutorium meum intende.

Domine ad adjuvandum me festina.

Gloria Patri, & Filio, &c.

Sicut erat in principio, & nunc, &c.  
Alleluia.

*Psal. CXVI.*

**L**audate Dominum omnes gentes:  
laudate eum omnes populi.

Quoniam confirmata est super nos  
misericordia ejus : & veritas Domini  
manet in æternum.

Gloria Patri, & Filio, &c.

Sicut erat in principio, &c.

*Antiphona.*

Sapiencia clamat in plateis : Si quis  
diligit Sapienciam, ad me declinet, &

eam inveniet : & eam cum invenerit ,  
 beatus erit , si tenuerit eam.

*Capitulum.*

Hanc ( Sapientiam ) amavi , & exqui-  
 sivi mihi sponsam assumere , & amator  
 factus sum formæ illius.

R. Deo gratias.

*Hymnus.*

**J**ESU Rex admirabilis , & triumphator nobilis , dulcedo ineffabilis , totus desiderabilis.

Nec lingua valet dicere , nec littera exprimere , expertus potest credere , quid sit Jesum diligere.

Amor Jesu continuus , mihi languor assiduus , mihi Jesus mellifluus , fructus vitæ perpetuus.

Æterna Sapientia , tibi Patrique gloria , cum Spiritu paracrito , in sempiterna sæcula. Amen.

ψ. Sapientia requiescit in corde ejus.

R. Et prudentia in sermone oris illius.

*Ad Benedictus , Antiphona.*

○ Sapientia.

**CANTICUM Zacharie.**

**B**enedictus Dominus Deus Israël,  
quia visitavit, & fecit redemptionem  
plebis suæ.

Et erexit cornu salutis nobis, in domo  
David pueri sui.

Sicut locutus est per os sanctorum:  
qui à sæculo sunt Prophetarum ejus.

Salutem ex inimicis nostris & de manu  
omnium qui oderunt nos.

Ad faciendam misericordiam cum  
patribus nostris, & memorati testamenti  
sui sancti.

Jusjurandum quod juravit ad Abraham  
patrem nostrum, daturum se nobis.

Ut sine timore, de manu inimicorum  
nostrorum liberati, serviamus illi.

In sanctitate & justitia coram ipso  
omnibus diebus nostris.

Et tu puer Propheta Altissimi vocaberis:  
præbis enim ante faciem Domini,  
parare vias ejus.

Ad dandam scientiam salutis plebi ejus,  
in remissionem peccatorum eorum.

Per viscera misericordiæ Dei nostri,  
in quibus visitavit nos oriens ex alto.

Illuminare his qui in tenebris & in  
umbra mortis sedent: ad dirigendos pe-  
des nostros in viam pacis.

Gloria Patri, & Filio, &c.

Sicut erat in principio, &c.

*Antiphona.*

O Sapientia: quæ ex ore Altissimi  
prodiisti, attingens à fine usque ad fi-  
nem fortiter, suaviterque disponens om-  
nia, veni ad docendum nos viam pru-  
dentiae.

Domine exaudi orationem meam.

Et clamor, &c.

*Oremus.*

Deus qui per coæternam tibi Sapien-  
tiam hominem; cum non esset, con-  
didisti, perditumque misericorditer re-  
formasti: præsta quæsumus, ut eâdem  
pectora nostra inspirante, te totâ mente  
amemus, & ad te toto corde curramus.  
Per eundem Dominum nostrum &c.

Benedicamus Domino.

Deo gratias.

Æterna Sapientia benedicat & custodiat corda & corpora nostra. Amen.

*Ita terminantur omnes Horæ.*

*Ad Primam.*

Salutem mentis & corporis donet nobis Jesus Sapientia Patris.

Deus in adjutorium meum intende.

Domine ad adjuvandum me festina.

Gloria Patri, & Filio, &c.

Sicut erat in principio, & nunc, & semper, &c. Alleluia.

*Hymnus.*

**A** Mor Jesu dulcissimus, & verè suavissimus, plus millies gratissimus, quàm dicere sufficimus.

Jesu decus Angelicum, in aure dulce canticum, in ore mel mirificum, in corde nectar coelicum.

Jesu mi bone sentiam amoris tui copiam, da mihi per præsentiam tuam videre gloriam.

Æterna Sapientia, tibi Patrique gloria; cum Spiritu paraclito, in sempiterna sæcula. Amen.

**A** Uditam fac mihi manè misericordiam tuam, quia in te ſperavi.

Notam fac mihi viam in qua ambulem, quia ad te levavi animam meam.

Eripe me de inimicis meis Domine, ad te confugi: doce me facere voluntatem tuam, quia Deus meus es tu.

Gloria Patri, & Filio, &c.

Sicut erat in principio, &c.

*Antiphona.*

Ego diligentes me diligo, & qui manè vigilaverit ad me; inveniet me.

*Capitulum.*

Sapientia vincit malitiam, attingit à fine uſque in finem fortiter, & diſponit omnia ſuaviter.

R. Deo gratias.

V. Jeſu Chriſte, Fili Dei vivi, miſerere nobis.

R. Qui ſedes ad dexteram Patris, miſerere nobis.

Gloria Patri, & Filio, &c.

Jeſu Chriſte, Fili Dei vivi, miſerere nobis.

☩. Exurge Domine, adjuva nos.

✠. Et libera nos propter nomen sanctum tuum.

Domine exaudi orationem meam.

Et clamor meus ad te veniat.

*Oremus.*

Corda nostra, quæsumus, Domine, æternæ Spientiæ splendor illustret: quo mundi hujus tenebris carere valeamus, & perveniamus ad patriam claritatis æternæ. Per eundem Dominum nostrum &c.

Benedicamus Domino, &c. *Ut supra.*

*Ad Tertiam.*

Salutem mentis & corporis donet nobis Jesu Sapientia Patris.

Deus in adjutorium meum intende.

Domine ad adjuvandum me festina.

Gloria Patri, & Filio, & Spiritui sancto.

Sicut erat in principio, & nunc, & semper, &c. Alleluia.

*Hymnus.*

**T**ua, Jesu, dilectio grata mentis refectione, replens sine fastidio, dans famem desiderio.

Qui tegustant, esuriunt, qui bibunt, adhuc sitiunt, desiderare nesciunt, nisi Jesum quem diligunt.

Desidero te millies, mi Jesu, quando lætum me facies, ut me de te aliquando saties?

Æterna Sapientia, tibi Patrique gloria, cum Spiritu paraclito, in sempiterna sæcula. Amen.

*Psalm. CXLII.*

**S**piritus tuus bonus deducet me in terram rectam propter nomen tuum.

Domine vivificabis me in æquitate tua.

Educes de tribulatione animam meam, & in misericordia tua disperdes omnes inimicos meos.

Et perdes omnes qui tribulant animam meam: quoniam ego servus tuus sum.

Gloria Patri, & Filio, &c.

Sicut erat in principio, &c.

*Antiphona.*

Fili, concupiscens Sapientiam, conserva justitiam, & præbebit eam tibi Dominus.



*Capitulum.*

Hanc Sapientiam amavi, & exquisivi à juventute mea, & quæsi mihi sponsam assumere & amator factus sum formæ illius.

*R.* Deo gratias.

*V.* Ego autem in Domino gaudebo.

*V.* Exultabo in Deo Jesu meo.

In Domino gaudebo.

Gloria Patri, &c.

Ego autem in Domino gaudebo.

Sit nomen Domini benedictum.

*R.* Ex hoc nunc & usque in sæculum.

*Oremus.*

Deus, qui per coæternam tibi Sapientiam hominem, cùm non esset, condidisti, perditumque misericorditer reformasti: præsta quæsumus, ut eâdem pectora nostra inspirante, te totâ mente amemus, & ad te toto corde curramus. Per eundem Dominum, &c.

*Ad Sextam.*

Salutem mentis & corporis donet nobis Jesus Sapientia Patris.

Deus in adiutorium meum intende.  
 Domine ad adjuvandum me festina.  
 Gloria Patri, &c.  
 Sicut erat in principio, & nunc, &c.  
 Alleluia.

*Hymnus.*

Jesu summa benignitas, mira cordis  
 jucunditas, incomprehensaque bonitas,  
 tua me stringat charitas.

Bonum mihi diligere Jesum, nîl ultra  
 quærere: mihi prorsus deficere, ut illi  
 queam vivere.

Jesu mi dilectissime, spes suspirantis  
 animæ, te quærunt piæ lacrymæ, &  
 clamor mentis intimæ.

Æterna Sapientia, tibi Patrique glo-  
 ria: cum Spiritu paraclito, in sempi-  
 terna sæcula. Amen.

*Psalms. XXXII.*

**A**nima nostra sustinet Dominum,  
 quoniam adiutor & protector no-  
 ster est.

Quia in eo lætabitur cor nostrum, &  
 in nomine sancto ejus speravimus.

Fiat misericordia tua, Domine, super nos, quemadmodum speravimus in te.

Gloria Patri, & Filio, &c.

Sicut erat in principio, &c.

*Antiphona.*

Dominus possedit me in initio viarum suarum, antequam quidquam faceret à principio, dicit Dominus.

*Capitulum.*

Candor est enim lucis æternæ, & speculum sine macula divinæ majestatis, & imago bonitatis illius.

R. Deo gratias.

ψ. Sit nomen Domini benedictum.

R. Ex hoc nunc & usque in sæculum.

Gloria Patri, & Filio, &c.

Sit nomen Domini benedictum.

Ex hoc nunc & usque in sæculum.

ψ. A solis ortu usque ad occasum.

R. Laudabile nomen Domini.

*Oremus.*

Exaudi nos, misericors Deus, & mentibus nostris Sapientiæ tuæ lumen ostende, & te super omnia diligere con-

cede. Per eundem Dominum, &c.  
Benedicamus Domino, *ut supra.*

*Ad Nonam.*

Salutem mentis & corporis donet nobis Jesu Sapiaientia Patris.

Deus in adiutorium meum intende. &c.

Gloria Patri, &c.

Sicut erat in principio, &c.

**Q**Uocumque loco fuero semper  
Jesum desidero, quàm lætus cùm  
invenero, quàm felix cùm tenuero.

Tunc amplexus, tunc oscula, quæ  
vincunt mellis pocula: sed in his parva  
morula, Jesum sequar per sæcula.

Jam, quod quæsi, video: quod  
concupivi, teneo: amore Jesu langueo,  
& corde totus ardeo.

Æterna Sapiaientia, tibi Patrique gloria,  
cum Spiritu paraclito, in sempiterna  
sæcula. Amen.

*Psalm. XI.*

**C**Or mundum crea in me Deus &  
Spiritus rectum innova in visceribus  
meis.

Ne

*Horarie.*

81

Ne projicias me à facie tua : & Spiritum sanctum tuum ne auferas à me.

Redde mihi lætitiā salutaris tui, & Spiritu principali confirma me.

Gloria Patri, & Filio, & Spiritui Sancto.

Sicut erat in principio, & nunc & semper, &c.

*Antiphona.*

Necdum erant abyssi, & ego parturiebar : quando præparabat cœlos aerem; cum eo eram cuncta componens.

*Capitulum.*

Sapientia speciosior est sole, & super omnem dispositionem stellarum, luci comparata, invenitur prior.

R. Deo gratias.

V. A solis ortu usque ad occasum

R. Laudabile nomen Domini.

Usque ad occasum.

Gloria Patri, &c.

A solis ortu usque ad occasum.

V. Sapientia requiescit in corde ejus.

R. Et prudentia in sermone oris illius.

F

Infunde, quæsumus, Domine, cordibus nostris lumen Sapientiæ tuæ: ut te veraciter agnoscamus & fideliter diligamus. Per eundem Dominum nostrum, &c. *ut supra.*

Benedicamus Domino, &c.

*Ad Vesperas.*

Salutem mentis & corporis donet nobis Jesu Sapientia Patris.

Deus in adiutorium meum intende.

Domine ad adjuvandum me festina.

Gloria Patri, &c.

Sicut erat, &c. Alleluia.

*Psalm. CX.*

**R**edemptionem misit Dominus populo suo: mandavit in æternum testamentum suum.

Sanctum & terribile nomen ejus: initium sapientiæ timor Domini.

Intellectus bonus omnibus facientibus eum, laudatio ejus manet in sæculum sæculi.

Gloria Patri, &c. Sicut erat, &c.

*Antiphona.*

Omnis sapientia à Domino Deo est, & cum illo fuit semper, & est ante ævum.

*Capitulum.*

Hanc (sapientiam) amavi & exquisivi à juventute mea, & quæsi mihi sponsam assumere, & amator factus sum formæ illius. *R.* Deo gratias.

*Hymnus.*

**J**esus sole serenior & balsamo suavior, omni dulcore dulcior, præcunctis amabilior.

Tu mentis delectatio, amoris consummatio, tu mea gloriatio, Jesu mundi salvatio.

Jesus auctor clementiæ, totius spes lætitiæ, dulcoris fons & gratiæ, veræ cordis deliciæ.

Æterna sapientia, tibi Patrique gloria, cum Spiritu paraclito, in sempiterna sæcula, Amen.

*Ps.* Ego autem in Domino gaudebo.

*R.* Exultabo in Deo Jesu meo.

*Ad Magnificat. Ant. O Oriens.*

**M**agnificat anima mea Dominum.  
Et exultavit spiritus meus in  
Deo salutari meo.

Quia respexit humilitatem ancillæ  
suæ: ecce enim ex hoc beatam me di-  
cent omnes generationes.

Quia fecit mihi magna qui potens est,  
& sanctum nomen ejus.

Et misericordia ejus à progenie in  
progenies: timentibus eum.

Fecit potentiam in brachio suo: dis-  
persit superbos mente cordis sui.

Deposuit potentes de sede, & exalta-  
vit humiles.

Esurientes implevit bonis & divites  
dimisit inanes.

Suscepit Israël puerum suum, recor-  
datus misericordiæ suæ.

Sicut locutus est ad patres nostros,  
Abraham & semini ejus in sæcula.

Gloria Patri, & Filio, &c.

Sicut erat in principio, & nunc, &  
semper, & in sæcula sæculorum, Am.



*Antiphona.*

O oriens splendor lucis æternæ, &  
Sol justitiæ, veni & illumina sedentes  
in tenebris, & umbra mortis.

Domine exaudi, &c. *ut supra.*

*Oremus.*

Deus, qui per coæternam tibi sapien-  
tiam hominem, cùm non esset, condi-  
disti, perditumque misericorditer refor-  
masti: præsta, quæsumus, ut eâdem pec-  
tora nostra inspirante, te totâ mente  
amemus, & ad te toto corde curramus.  
Per eundem Dominum nostrum, &c.

Benedicamus, &c. *ut supra.*

*Ad Completorium.*

Salutem mentis & corporis donet no-  
bis Jesus sapientia Patris.

Converte nos Deus salutaris noster.

Et averte iram tuam à nobis.

Deus in adjutorium meum intende.

Domine ad adjuvandum me festina.

Gloria Patri, &c.

Sicut erat in principio, &c. Alleluia.

## Psalm. XII.

**I**llumina oculos meos, ne unquam  
obdormiam in morte: nequando dicat  
inimicus meus, prævalui adversus eum.

Qui tribulant me, exultabunt si motus  
fuero: ego autem in misericordia tua  
speravi.

Exultabit cor meum in salutari tuo:  
cantabo Domino, qui bona tribuit mi-  
hi & psallam nomini Domini altissimi.

Gloria Patri, &c.

Sicut erat in principio, &c.

*Antiphona.*

Ego in altissimis habito, & thronus  
meus in columna nubis.

*Capitulum.*

Sobrietatem & sapientiam docet, &  
justitiam, & virtutem, quibus nihil est  
utilius in vita hominibus.

R. Deo gratias.

ψ. In pace in idipsum dormiam &  
quiescam.

R. Si dederō somnum oculis meis,  
& palpebris meis dormitationem.

Dormiam & requiescam.

Gloria Patri, & Filio, & Spiritui  
sancto.

In pace in idipsum dormiam & re-  
quiescam.

*Hymnus.*

**J**esus in pace imperat, quæ omnem  
sensum superat: hunc mea mens de-  
siderat, & illo frui properat.

Te cœli chorus prædicat, & tuas  
laudes replicat: Jesus orbem lætificat,  
& nos Deo pacificat.

Jesus ad Patrem rediit, cœleste reg-  
num subiit: cor meum à me transiit,  
simul post Jesum abiit.

Æterna sapientia, tibi Patrique glo-  
ria, cum Spiritu paraclito, in sempiter-  
na sæcula, Amen.

℣. In pace factus est locus ejus.

℟. Et habitatio ejus in Sion.

*Antiphona* O Rex gloriose.

**N**unc dimittis servum tuum Domi-  
ne, secundum verbum tuum in pace.  
Quia viderunt oculi mei salutare tuum.

Quod parasti ante faciem omnium  
populorum.

Lumen ad revelationem gentium, &  
gloriam plebis tuæ Israëli.

Gloria Patri, & Filio, &c.

Sicut erat in principio, &c.

*Antiphona.*

O Rex gloriose, qui inter Sanctos tuos  
semper es laudabilis, & tamen ineffabilis:  
tu in nobis es Domine, & nomen sanc-  
tum tuum invocatum est super nos; ne  
derelinquas nos Deus noster: ut in die  
judicii nos collocare digneris inter Sanc-  
tos & electos tuos: Rex benedicte.

Domine exaudi. *ut supra.*

*Oremus.*

Fragilitatem nostram, quæsumus Do-  
mine, propitius respice, & saporem no-  
bis æternæ sapientiæ benignè infunde; ut  
ejus dulcedine mellifluâ prægustatâ,  
omnia terrena valeamus despicere, & tibi  
summo bono ardenti desiderio jugiter  
adhærere. Per eundem Dominum no-  
strum Jesum Christum Filium tuum, &c.

Benedicamus Domino. *ut supra.*

# MEDITATIONES

Quotidianæ juxta ordinem dierum hebdomadæ.

## PRÆFATIO.

**I**Nter omnia pietatis vera exercitia, Christiane Lector, nihil præstantius, nihil Deo gratius, hominique utilius ac magis necessarium & ad benè beatèque vivendum accomodatius esse potest, quàm se diligenter in assidua vitæ & Passionis Domini nostri JESU Christi meditatione exercere: id quod non modò sanctissimorum ac eruditissimorum hominum exempla & doctrina, sed ipsa etiam experientia rerum magistra luculenter ostendit, atque confirmat Si enim vitia vis fugere, & peccata declinare, tecum expende, quid non egerit ac passus sit triginta tres annos unigenitus Filius Dei, ut te à peccatis & à vitiis omnibus liberaret. Si humilitatem, mansuetudinem, patientiam, obedientiam, charitatem, cæterasque Christi

virtutes amas, iisque animum tuum ornare desideras, inspicere vivum & absolutum, omnis virtutis exemplar Dominum tuum JESUM Christum. Si verò vis mundum, & ea quæ in mundo sunt, contemnere, ac pro nihilo ducere, seriò tecum cogita, qualem in hoc mundo vitam Christus Dominus egerit, quàm pauperem, quàm vilem & abjectam quantisque laboribus & doloribus plenam, quas insidias & calumnias, qualem denique mortem tui amore tuæque salutis causâ pertulerit. Si denique ad Dei amorem & gratiarum actionem te velis excitare atque inflammare; quid quæso, efficacius quàm Christi vitam & passionem, & quàm multa atque immensa ex illis beneficia simus consecuti sedulò meditari; ut non immeritò dixerit Apostolus: Recogitate eum qui talem sustinuit à peccatoribus adversus semetipsum contradictionem, ut non fatigemini, animis vestris deficientes, & D. Petrus, Christo, inquit, passo in

carne, & vos eadem cogitatione armamini. Cæterum ut majori cum fructu meditationibus istis utaris, Christiane Lector, talis erit in iis tibi servanda ratio, ut orationis tempore primò quidem puncta omnia illius diei perlegas, deinde verò in illius contemplatione diutiùs hæreas, in quo magis perlegendo afficiebaris; meditans porrò de virtute aliqua, sedulò tecum perpendas, quàm studiosè Christus Salvator tuus se in ea exercuerit, tibi exemplum præbens, ut vestigiis ipsius diligenter insistas. Atque tunc ipse tecum statues, ad ejus imitationem te, præsentē illo die, in eadem illa virtute aliquem progressum facturum: dabisque proinde operam, sæpius interdum conceptum propositum in mentem revocare, atque occasiones non negligere, quibus in ea te virtute exerceas. Puncta autem quinque sunt, primum, ex Christi infantia; secundum, ex ejus vitâ; tria deinceps sequentia ex ejusdem passione desumpta.

*Meditationes*  
**DIE DOMINICO.**  
*De humilitate Christi.*

**P**Rimo igitur cogitabis, quanta humilitate Dei Filius, summus ille totius orbis Monarcha, è Cœlis in virgineum humilis Virginis Mariæ uterum descenderit, atque seipsum exinanierit formam servi accipiens: Rogabis proinde eundem illum Dominum, ut veram humilitatem donet, gratiamque tibi infundat, quâ superbia omnis, inanis gloria atque tui ipsius complacentia ex corde tuo radicatus evellantur: considerabisque tecum sæpenumerò, quot quantisque adhuc imperfectionibus sis obnoxius; quàm miserè in vitia quotidie labaris, quàm denique parum hætenus in virtutibus promoveris.

Secundò considerabis, quanta animi demissione à Joanne Baptista se baptizari sit passus, haud aliter quàm si homo peccator fuisset, indigens purgatione aut expiatione, qui tamen Deus verus & homo, ab omni prorsus sorde peccati



immunis , ipsi etiam Joanni gratiam omnem , quâ præditus erat , contulerat. Tu igitur , vermiculus cùm sis , creatoris tui exemplo quibusvis qui te vel docent vel hortantur , vel reprehendunt , subjcito , etiamsi multò te sint & inferiores , & imbecilliores.

Tertiò summam illam humilitatem perpende , quâ instante passionis tempore humanam suam exponens infirmitatem , animi sui tristitiam Apostolis declaravit , cùm diceret ; tristis est anima mea usque ad mortem : cùm tamen ille ipse sit , qui verâ lætitiâ tam eos qui in cœlis , quàm qui in terris degunt , perfundit. Disce igitur non nimium tibi fidere , neque in tentationibus ( quæ vel exterius vel interiùs obveniunt ) de te ipso plus æquo præsumere ; sed submissè de te sentiens aliorum sana consilia non vereare & petere & amplecti.

Quartò considera , quàm humiliter Christus Dominus omnium potentissimus veluti tamen homo ab omni auxilio

destitutus, in terram se prostraverit, Patremque suum, ut nostra expiaret crimina, illacrymans oraverit, & præ amoris magnitudine sanguineum sudorem largiter emiserit. Ea propter etiam tu in quavis tribulatione & cordis angustia humili oratione te ad Christum Salvatorem convertas, nihilque tibi amore illius indulgeas, te totum ejus voluntati consecres.

Quintò intuere, quàm fuerit humilis illa resignatio, quâ voluntatem suam cœlesti Patri (cui tamen, ut Deus, æqualis erat) promptissimè obtulit, ita dicens: non mea, sed tua voluntas fiat: quamque non fuerit dedignatus Angeli consolationem seu confortationem admittere, qui alioqui totius orbis est consolator, omnesque in agone confortat. Igitur & tu profunda humilitate, Dei te voluntati submittas omnibus in rebus, quæ vel interius vel exterius evenire possunt, magna cum fiducia consolationem cœlestem expectans.

*Sub finem Meditationis, hanc talem  
orationem adjungito.*

Domine Jesu Chrifte, Fili Dei vivi, ipse verus Deus, & potentissimus rerum omnium conditor & moderator, qui ut humilitatis nobis exemplum relinqueres, à sublimi cœlo in hanc terram descendisti humanam nostram infirmitatem atque abjectionem assumens; à servoque tuo Joanne velut impurus peccator baptizari voluisti, & passione tua jam instante, charis discipulis cordis tui tristitiam patefecisti, prostratusque in terram, sudore sanguineo emisso, humillimè voluntatem tuam in voluntatem Patris resignasti, aliaque quàm plurima egisti quæ summæ humilitatis sunt argumenta: Precor, ut profundam mihi dones humilitatem, quâ me omnibus facile lubensque subjiciam, neque altè de me ipso sentiam; sed vilis sim abjectusque semper in oculis meis, & talis ab omnibus haberi cupiam. Qui cum Deo Patre in unitate Spiritus Sancti vivis & regnas Deus in sæcula benedictus. Amen.

*De mansuetudine Christi.*

**P**rimò eam mansuetudinem diligenter expende, quâ innocens ille puerulus jam recens natus orbi se ostenderit, licet inimicissimo: Ora eundem ipsum, ut veram innocentiam & cordis mansuetudinem donare dignetur.

Secundò cogita, quantâ mansuetudine quantâque modestiâ cum Apostolis suis, licet imperitis ac simplicibus, versatus sit tam verbis quàm factis mansuetudinem omnem significans, quàmque mansuetè Judæorum captiosis & malignis quæstionibus responderit. Quocirca etiam tu summâ modestiâ animique mansuetudine cum omnibus versari discas, neque verbo, neque opere ullum immodestiæ signum præbeas, quantumcumque tibi verbis aut factis adversantur.

Tertiò, vide, quam mansuetè Judam proditorem sit exosculatus, & se capiendum hostibus benignè obtulerit, omniaque corporis membra stringenda  
præ-

præbuerit. Proinde & tu mansuetè, & amicè his omnibus occurras, qui te vel spernunt vel ludibrio habent, quantumvis gravem tibi irrogaverint injuriam.

Quartò, quâ sit usus mansuetudine, considera, dum coram Caipha ita ligatus staret, quàm mansuetè ipsi insidiosè interroganti responderit, ac diram sit alapam perpeffus. Quapropter etiam tu mansuetè feras, si quando tibi duriter respondeatur: etiam si rectè tibi, tuo quidem judicio, aut fecisse, aut dixisse videaris.

Quintò, illam quoque mansuetudinem perpendes quam coram eodem Caipha singularem exhibuit, in omnibus illis occultis pœnis ac illusionibus, cum videlicet facies illa suavissima (in quam desiderant Angeli prospicere) tam ignominiosè velaretur, alapis & colaphis crudeliter cæderetur, & tam foedè conspueretur, aliisque id genus multis tormentis afficeretur, quæ nulli unquam mortalium innotuerunt. Tu igitur dis-

cas mansuetè ferre quidquid molestiarum vel interiùs vel exteriùs occurrit. Atque si occultè tibi quispiam molestus sit, magnâ id æqualitate, animi alacritate, hilarique vultu sustineas, idque ob amorem amici Salvatoris, & dilectissimi animæ tuæ sponsi Jesu Christi Domini nostri.

### *FINITA MEDITATIONE*

*Ita precabere.*

Domine Jesu Christe, præclarum omnium virtutum exemplar, qui summam semper omnibus mansuetudinem præbuiisti, tam in nativitatis tuæ exordio; quando te mundo ostendisti inimicissimo, quàm per totam reliquam vitam, in qua modestiâ summâ cum discipulis rudibus & Judæis continenter insidiantibus versatus es: quàm denique passionis tempore, cum & proditorem Judam mansuetissimè deosculabaris, & Judæis eadem semper modestiâ te ipsum exhibuisti, quantumvis duriter ligarent, cæderent, in faciem conspuerent, multasque irrogarent injurias: Rogo humil-

limè, ut veram mihi largiaris mansuetudinem; quâ sedato animo mea omnia peragam, modestèque me apud alios habeam, atque mansuetè cum omnibus verfer, sive benignè sive duriùs mecum agant. Qui vivis & regnas cum Deo Patre & Spiritu Sancto Deus in omnia sæcula. Amen.

**DIE MARTIS.**

*De patientia Christi.*

**P**Rimò diligenter adverte singulare patientiæ exemplum, quod tibi in tenerrima illa ætate, nimirum in sua circumcissione præbuit, in qua pretiosum suum sanguinem benignè pro nobis fundens gravi illo vulnere tenellus adhuc infantulus afflictus fuit. Idcirco in te vitia omnia, omnes pravas affectiones, omniaque mala desideria circumcidere & amputare stude. Et ut Christus legem ex animo perfecit, ita etiam ne ad latum unguem à tibi præscriptis vivendi legibus deflectas, quin potiùs ad eas temetipsum componas, licèt id na-

turæ nonnumquam molestum videatur.

Secundò, cogita, quantâ patientiâ Judæorum omnes iniquas persecutiones tolerarit, quando eum truculento vultu contuebantur, quando à dæmonio obsessum dicebant, quando nunc lapidibus eum obruere, nunc de monte precipitare satagebant. Esto & tu ergo patiens in omnibus iis, quæ tibi occurrunt, molestiis: atque æquabilem te præbeto, modestum & quietem in omnibus quæ obijciuntur tibi, vel impinguntur.

Tertiò, contemplare, quanta fuerit ejus patientia in domo Pilati, quando tot conficta mendacia, & iniquas calumnias patientissimè sustinuit. Si quando itaque tibi falsum crimen obijcitur, aut quâvis aliâ injuriâ præter meritum afficeris, ita ut contemnaris, vilis vel improbus habearis, tunc verbo illo Salvatoris te solare: non est discipulus super magistrum suum, nec servus major Domino suo, & illo quod ad Pilatum dixit: Regnum meum non est de hoc



**mundo ; ac proinde ne hîc ullum quaeres honorem.**

Quartò , considerabis etiam quàm patienti animo probra , injurias atque irrationes , in domo Herodis perpessus sit , & quo pacto ad Pilatum non aliter atque stultus aliquis & delirus per plateas ductus omnium risibus fuerit expositus , neque in his omnibus verbum unum responderit , aut ullum impatientiae signum exhibuerit. Sic tu quoque patienter taceas , etiam si ob id simplex , rudis , vilis , imperitus ac stultus reputeris.

Quintò , meditare , quantâ crudelitate sponfus atque salvator animæ tuæ columnæ alligatus , quantâ patientiâ durissima illa verbera propter te sustinuerit. Disce igitur etiam tu confusionem omnem , quocumque modo ea tibi acciderit , non solum infracto animo tolerare , sed ob Christi amorem libenter illi teipsum subicere. Disce omnem incommoditatem , dura verba , & quidquid tibi adversi acciderit , æquanimi-

ter sustinere. Disce nec verbera, si quæ Christi amore inferantur, refugere, memor tot tantarumque plagarum, quas Redemptor tuus Christus amore tui accepit.

## SUBJUNGES DEINDE

*Precationem ejusmodi.*

Domine Jesu Christe, patientiæ speculum, & auctor omnium bonorum, qui tener infantulus circumcisionis dolores patientissimè tulisti, in omnibusque Judæorum conviciis, & quas intulerunt, plagis atque diris flagellis, infractum semper animum & benignum exhibuisti: obsecro, ut hanc mihi infundas gratiam, quâ summâ constantiâ, quæ Christianum hominem officiumque meum decent, perficiam, injurias omnes illatas fortiter perferam, neque prorsus ad ullas adversitates commovear, sed æquabili sim animo, tam in contrariis quàm rebus secundis. Qui vivis & regnas cum Deo Patre in unitate Spiritus, &c.

**DIE MERCURII.**

*De Obedientia.*

**P**rimò hìc de obedientia trium Regum cogitabis, qui statim visâ stellâ, regnis, divitiis, patriâque relictis ad exteras regiones profecti, recens natum Regem inquisiverunt, inventumque oblatiis muneribus prostrati in terram adoraverunt. Et tu igitur in primis summâ diligentia internas inspirationes, & Sancti Spiritus pias suggestiones observato, deinde sedulò, quod admonet, perficito, Deoque voluntatem tuam in omnibus offerre studeto.

Secundò ad Christi Domini tui attende obedientiam, quòd nulla in re sibi Christus pepercerit ut Patris voluntatem perficeret, in jejuniis, in vigiliis, orationibus, concionibus, fatigationibus, quas pro convertendis peccatoribus perpeffus est. Quid multis? adeò promptè Patri in omnibus obtemperavit ut dicere sit solitus: *Meus cibus est, ut faciam voluntatem Patris mei, &c.*

Neque tu igitur laborem ullum detrectes, qui tibi ex obedientia obeundus est, nec ullis impendiis parcas, ut proximi saluti consulas, quantumvis id tibi molestum videatur.

Tertiò, obedientiam summam Christi Salvatoris admirare, quam non solum Patri æterno ad mortem usque crucis præstitit, verum etiam impiis tortoribus, quando illis purpuram induentibus morem gerebat, jussus sedere obtemperabat, imponentibus coronam spinæam inclinabat caput, & arundinem contumeliosè oblatam benignè suscipiebat, atque ita in cæteris, quantumcumque duris & acerbis, promptè obsequebatur. Libenter igitur tu quoque aliis obtempera in iis, quæ salvâ & bonâ conscientiam ac citra peccatum ullum facere queas, & facilem ac promptum te illis exhibeas, qui operam tuam expectunt, in quocumque negotio, quantumvis etiam molesto.

Quartò, illam quoque non leviter

pertranseas obedientiam quâ ad Præsidis Pilati jussionem ad populum, ridendus ab omnibus, Rex gloriæ processit, ludicrâ illâ purpurâ indutus, spineâ coronâ redimitus, arundinem manibus gestans, totoque corpore miserè dilaniatus. Quantâ hic confusione perfundebatur, omnium ludibriis expositus? quamque graviter aures ejus percutiebant crudeles illæ durissimæque voces, quibus omnes illi ac clamabant, Crucifige, Crucifige eum. Esto igitur & tu obediens in toleranda quavis confusione & contumelia, à quocumque, siue meritò, siue immeritò illata.

Quintò cogitabis, quantâ obedientiâ summus ille Judex vivorum & mortuorum iniquam mortis sententiam susceperit ab Ethnico, & impio judice. Ideo & tu Dei in primis, deinde majorum tuorum voluntatem in omnibus lubens perficias, ad mortem usque obedire paratus esto; nihil vana aliorum judicia, nihil verba aliorum reveritus à cœpto

desistas, aut infincerè quidpiam agas: quin potius tibi persuasum habeas hanc Dei esse voluntatem, nec quemquam in te ullam habere potestatem, quæ non sit data desuper.

## ORABIS DENIQUE

*Tali modo.*

Domine Jesu Christe, summe totius orbis Imperator, cui ad nutum omnia obediunt, cui se Reges inclinant & cui subsunt cunctæ prorsus creaturæ: Rogo te per insignem illam obedientiam, quâ te totum ita Patris voluntati subdidisti, ut fatereris, esse cibum tuum ejus jussionem implere: neque illi tantum parvisti, verum etiam hominibus quantumvis improbis, ut judici Pilato in suscipienda mortis sententia, & impiis tormentoribus in his, quæ ad inferendas poenas iniquè præcipiebant. Rogo inquam ut gratiam mihi largiaris, quâ tuis imprimis sanctissimis mandatis, & piis internis Spiritûs Sancti suggestionibus obtemperem, cœcam, velocem, alacrem, atque hu-

milem obedientiam superioribus meis libenter præstem. Qui vivis & regnas cum Deo Patre & Spiritu Sancto Deus in omnia sæcula benedictus. Amen.

**DIE JOVIS.**

*De amabili benignitate Christi.*

**P**rimò considera, quàm amabili Christus benignitate in illius senis Simeonis ulnis præsentatus in templo requieverit: precare ipsum ut in ulnis animæ tuæ quiescens dulcedinem cordis tibi largiatur, & benignitatem amabilem, quâ cum omnibus hominibus suaviter & amanter verferis.

Secundò, benignitatem illam tecum expendas, quâ simplicium discipulorum, adeoque ipsius proditoris Judæ pedes, positis in terram genibus, & laverit, & terferit, & osculatus sit, quâ etiam Apostolis, & nobis omnibus in perpetuam suæ passionis suæque erga nos immensæ charitatis memoriam, se ipsum in Sacramento Eucharistiæ dederit: quâ denique benignitate eosdem

ob discessum passionemque suam jam contristatos in extrema cœna consolatus sit. Da ergo operam, benignum & affabilem te exhibere omnibus hominibus, etiamsi duro & alieno à te animo esse videantur.

Tertiò considera, quàm benignè ingens peccatorum nostrorum pondus in se suscepit, ponderosam illam crucem in terram acclinis benignè portarit, quàmque amicè ad mulieres conversus eas compellaverit dicens: Filiæ Jerusalem, nolite flere super me, sed super vos ipsas flete, &c. Proinde hilari ac benigno animo jugum Domini Salvatoris, sine obmurmuratione suscipito; neque umquam tibi plus impositum esse causeris, quàm merueris, aut ferre queas. Præterea, si quandoque aliquis operam tuam deponat, non te morosum aut difficilem, sed benignum exhibeas, nec desidera, ut quis tibi compatiatur, quin potiùs tu aliis omnibus compatere ac subveni: quoad ejus fieri poterit.



Quartò, expende, quâ benignitate jam jam cruci affigendus, crudeles illos tortores juverit, dum illi vestes vulneribus inhærentes tam immaniter detraherent. Sis itaque etiam tu benignus illis, qui vitia tua, tuosque defectus tibi aperiunt: nec tantisper expectes ea exuere, donec te necessitas compellat, aut quis te acriter urgeat; sed illicò ut advertis quid alius in te reprehendere velit, non te excusa: verùm agnitâ culpâ tuâ, id omni conatu emendare contende.

Quintò, considera, quàm benignè & amanter Salvator tuus in crucem tam horrendè projectus, extenderit brachia sua, diris clavis cruci affigenda; quàmque benignè eos aspexerit, qui illum tam crudeli ac ignominiosâ crucis morte afficiebant. Quocirca tu quòque benignum blandumque atque amabilem vultum iis etiam omnibus præbeas, qui tibi vel maximè adversantur, lætoque animo de manu Domini suscipito, quidquid adversitatis occurrit: & vires denique tuas

omnes alacriter libenterque in Dei servitium, fratrumque tuorum utilitatem exponas.

*Postea autem sic orabis.*

Domine Jesu Christe, benignissime Deus, qui summâ semper amabilique benignitate erga tuos usus fuisti, quando infantulus in ulnis Simeonis requiescebas; quando Apostolorum lavabas pedes; quando crucem ponderosam bajulans; ad mulieres conversus eas consolabaris, vestibus spoliabaris, & manus crudeliter perforandas porrigebas, precor te, ut etiam benignitatem amabilem mihi conferas, quâ cum omnibus prout convenit, converfer, animi summâ dulcedine cum illis agam, nec adversantibus sim asperior quàm faventibus, verum amabilem dulcemque benignitatem omnibus exhibeam. Qui vivis & regnas cum Deo Patre & Spiritu Sancto Deus in sæcula benedictus, Amen.

## DIE VENERIS.

*De inestimabili ardentissimaque charitate Christi Domini.*

**P**rimò cogita diligenter, quantà Christus Dominus accensus fuerit charitate, quando ut te hæredem constitueret regni Patris sui, profugus esse voluit in terra aliena, furorem Herodis in summa paupertate infantulus adhuc tenerimus cum Matre declinans. Fugias igitur, quâlibet tentatione ingruente, in amabile cor Christi ejusque aperta vulnera; in iis ineffabilem ejus bonitatem atque charitatem contemplare; è regione autem tuam abjectionem, malitiam & infidelitatem: ut ex tali consideratione superbus tuus arrogansque animus deprimatur, & ad Deum redamandum inflammetur.

Secundò perpende etiam atque etiam, quàm singulari dilectione omnes homines prosequatur, dum cunctos, quibuscumque premantur miseriis aut malis, amanter ad se invitat, ut eos sublevatos

recreet. Venite, inquires, ad me omnes qui laboratis, & onerati estis, & ego reficiam vos. Tu itaque magna cum fiducia ad ipsum accede, quantumcumque te peccata gravent, sperans, si modo illi obtemperes, certò te liberatum iri. Atque etiam da operam, ut Dei amorem in temetipso experiare, qui efficiet, ut nihil tibi durum sit, aut molestum, juxta illud D. Bernardi: Amanti nihil est difficile.

Tertiò, considera tecum sedulò quantà charitate animæ tuæ sponsus vires suas omnes tribus continuò horis è ligno crucis suspensus exhausserit, atque ita planè sacratissimum ejus corpus exaruerit, ut nihil in eo remanserit humoris. Tu ergò, ut tanto amorì aliquid rependas, in ejus servitium nihil tibi parcas: sed in iis quæ grata illi fore cognoscis, libenter vires tuas omnes ejus amore consumas. Cura autem sedulò, ne eas in proprio tuo judicio atque voluntate & pravis concupiscentiis adimplendis expendas.

**Quartò**

Quartò, quanto amore septem illa postrema verba cruci affixus protulerit, perpende, quibus ille nobis immensam charitatem, quam cordi inclusam tenebat, testatam reliquit. Esto igitur in verbis tuis Christi amore tam modestus atque maturus, tamque verax, humilis & benignus, ut facilè quivis enim advertere possit te verum Dei timorem & amorem in corde gestare.

Quintò, diligenter tecum animo versa, quàm ineffabilis fuerit illa charitas, quâ Deus summus in maximis cordis angustiis, & totius mundi opprobriis, pro te vilissimo vermiculo illam crucis acerbissimam mortem perpeffus fuerit. Tu, qui nihil dignum tanto amore referre potes, hoc tantùm conare, ut sensualem omnem affectionem in te mortifices; radices vitiorum evellas, atque ita te componas ut mundo mortuus soli Christo vivas, eique te totum dedas, qui etiam ad extremam usque ignominiam summosque cruciatus seip-

sum totum tibi impendit, quando & sanguinem universum in tuam utilitatem profudit, & animam denique ipsam pro tua salute liberalissimè dedit.

*Hanc demum subjungas orationem.*

Domine Jesu Christe, charitas increata, qui tanto amore salutem nostram semper sitivisti, ut veluti profugus in aliena terra peregrinari dignatus sis, cujus est terra omnis, & plenitudo ejus, & prætereà omnium hominum, qui ad te veniunt, misérias & calamitates sustollere promiseris; denique, post immensos nostri causâ exantlatos labores etiam sanguinem universum profundere, & animam pretiosissimam pro nobis ponere volueris: per hæc te supplex oro, ut mihi veram charitatem infundas, quâ te in primis ardentissimè diligam, deinde proximum omnem in te & propter te summo complectar amore, nihilque mihi in rebus illis parcam, quibus vel tibi vel proximo obsequium aliquod exhibere queam, quantumvis id durum sit mi-

hi atque molestum. Qui vivis & regnas cum Deo Patre & Spiritu Sancto Deus in omnia sæcula benedictus. Amen.

DIE SABBATHI.

*De liberalitate & compassione Christi Salvatoris.*

**P**rimò, illam liberalitatem expende, quâ seipsum puer duodecim annorum in templo manifestavit hominibus declaraturus ob quam causam in hunc mundum venisset, nimirum ut cœlestis sapientiæ ac divinæ gratiæ suæ thesaurum liberaliter nobis communicaret. Semper igitur tibi ob oculos pone, qua de causa in hunc mundum veneris, videlicet non ut tua confecteris commoda, aut tibi plus æquo indulgeas, sed ut potius deferas te totum divinæ voluntati & obsequio, proximorumque tuorum utilitati offeras; atque aliorum commoda tuis præponas.

Secundò, ut summam Christus Salvator tuus liberalitatem omnibus exhibuerit, adverte. Aliquando enim in me-

dio populi stans, ita clamabat. Si quis sitit, veniat ad me, & bibat; paratum se ostendens omnium necessitatibus subvenire. Idcirco esto etiam tu erga omnes liberalis: & si quando accidit, ut opere illis succurrere nequeas, tunc verbis piis atque indicibus aliis exterioribus talem te illis exhibeas, ut vel sic cordis tui liberalitatem declares.

Tertiò, considerato, ut liberalissimè tibi cordis sui pretiosum Sanguinem propinavit, quando, sacro latere aperto, quidquid reliquum erat in corpore sanguinis profudit. Tu vicissim te illi gratum præbeas, atque ob ejus amorem libentissimè in omnia, quæ etiam naturæ molesta sunt, effundas.

Quartò, de summis & internis Sacratissimæ Mariæ doloribus diligenter cogita, quantâ videlicet cordis tristitiâ toto illo passionis tempore affecta fuerit, quando oculis ipsa suis dilectissimum filium suum in cruce suffixum conspiciebat, quando in tantis eum angustiis vide-



bat, & inter tantos cruciatus morientem cernebat; quando denique post mortem sinu suo eum complexa, omnia ejus vulnera maximo animi mœrore contemplanſ, lacrymis irrigabat. Ac proinde tu de ſponſi tui paſſione ſæpiùs cogitans, ſedulò eam mente revolvens, Chriſto ejusque benediſtæ Matri compaſcere, dolorem aliquem in te excitans, quod tam ingentes cruciatus in gratiam tui Salvator Chriſtus fuerit perpeſſus. Ge-  
ras te interim apud omnes modèſtum atque maturum, citra ullam animi vacillationem ac dubitationem tam in adverſis quàm proſperis, ac iis omnibus quæ vel lætitiàm vel mœrorem adferre poſſunt.

Quintò, denique perpendas, quanto dolore matris ac aliorum piorum hominum Chriſtus Dei Filius ſepultus ſit. Tu igitur dabis operam Chriſti Domini paſſionem in corde geſtare, eamque ſæpius mente revolvere: prætereà conſcientiæ tuæ ſepulchrum frequenter verà contritione ac oris confeſſione purgare; deni-

que voluntario ac liberali animo, in memoriam passionis Christi poenitentiam peccatis debitam exsolvere, omnia in laudem Salvatoris nostri Jesu Christi, qui cum Patre & Spiritu Sancto regnat Deus in sæcula benedictus. Amen.

## POSTREMO EJUSMODI

*Ad Deum orationem fundas.*

Domine Jesu Christe potentissime atque liberalissime Deus, qui summâ liberalitate te ipsum totum nobis donasti, quando in maximis laboribus & corporis molestiis nihil tibi parcens, omnes sitientes ad te venire jussisti, ut aquâ salutare eos potares, & liberalissimè cœlestis sapientiæ divinæque gratiæ thesaurum illis communicares; denique sanguinem universum; illum etiam qui in corde, interioribusque visceribus latebat, ut te totum nobis impendere non dubitares, liberalissimè effudisti: oro ut mihi liberalem des animum; quo non solum in tuum obsequium, sed in auxilium quoque salutemque proximorum me totum,

meaque omnia liberaliter impendam.  
Fac etiam (precor) ut sedulò & continenter passionem tuam, doloremque Sanctissimæ Matris in corde gestem, quorum meditatione vitam meam Christiano homine & vocatione meâ dignam traducam, animumque meum ita componam, ut dignus sit, in quo per gratiam tuam quiescas & habites unâ cum Deo Patre & Spiritu Sancto in omnia sæcula. Amen.

## MODUS TEMPORE

*Matutino Deo se commendandi.*

**M**atutino tempore ut rectè te Christo commendes, pauca quædam tibi servanda erunt.

Primum: ut surgens initio te signo crucis munias, neque statim ad fabulas aut inanes cogitationes te convertas, sed in silentio, mente ad Deum elevatâ, ad proximam te præpares orationem.

Secundum: ubi in genua te oraturus provolveris (tali enim ratione orandus est Deus) gratias agas in primis Deo, deinde

Sacratissimæ Matri, Angelo Custodi, omnibusque Sanctis, de nocte jam feliciter transactâ, quod mortuus in peccatis non fueris (quemadmodum multis contingit) sed ad hunc diem servatus sis, ut per fidem, poenitentiam ac Christianæ legis operâ gratiam Dei tibi concilies in hoc brevi & incerto vitæ curriculo, orabisque ut diem istum transigas ad Dei gloriam, animæque tuæ salutem.

Tertium, ut seriò tecum proponas, die illo præsentē nihil velle committere quo Deus offendatur; prætereà in virtute aliqua te constituas exercere, quam in præcedentibus Meditationibus invenire queas.

Quartum, consultum fuerit, obiter horas diei percurrere, & generatim, quoad ejus fieri potest, quid toto die facturus sis, tecum supputare.

Postremò, piis quibusdam orationibus ad Deum conversus, supplex ejus implores auxilium. Inter cetera autem poterunt & hæc, quæ sequuntur, recitari.

*Quotidiana.*  
**HYMNUS.**

121

**I** Am lacis orto fidere,  
Deum precemur supplices,  
Ut in diurnis actibus  
Nos servet à nocentibus.

Linguam refrenans temperet,  
Ne litis horror insonet,  
Visum fovendo contegat,  
Ne vanitates hauriat.

Sint pura cordis intima,  
Abstinet & vecordia;  
Carnis terat superbiam  
Potus cibique parcitas.

Ut cùm dies abscefferit,  
Noctemque sors reduxerit,  
Mundi per abstinentiam  
Ipsi canamus gloriam.

Deo Patri sit gloria,  
Ejusque soli Filio,  
Cum Spiritu paraclito,  
Et nunc & in perpetuum. Amen.

*Oratio.*

**D**omine Deus omnipotens qui ad  
principium hujus diei nos pervenire

fecisti: tuâ nos hodie salva virtute, ut in hac die ad nullum declinemus peccatum, sed semper, ad tuam justitiam faciendam, nostra procedant eloquia, dirigantur cogitationes & opera. Per Dominum nostrum Jesum Christum, &c.

Sancta Maria, & omnes Sancti intercedite pro nobis ad Dominum, ut nos mereamur ab eo adjuvari & salvari, qui vivit & regnat in sæcula sæculorum. Amen.

Dies & actus nostros in sua pace disponat Dominus omnipotens. Amen.

## QUID IN PROGRESSU

*Diei subinde agendum.*

**I**Nterdiu dabis operam: ut eorum, quæ manè proposuisti, memineris, & bene agendi propositum subinde renoves, atque frequentissimè brevi admodum seu jaculatoria oratione animum ad Deum convertas, ut te semper illi cognoscas esse præsentem, & propterea eum continenter ob oculos habeas. Si quando autem aliquid aggrediendum tibi

erit, ita cum Ecclesia precari affuesce.

Actiones nostras, quæsumus Domine, adspirando præveni, & adjuvando prosequere; ut cuncta nostra oratio & operatio à te semper incipiat, & per te cœpta finiatur. Per Christum, &c.

## STUDIA VERO TUA

*Aggressurus, hanc piam Orationem, à B. Thoma compositam, non infructuosè præmittes.*

**C**reator ineffabilis, Dominus meus, & Deus meus, qui de thesauris tuæ sapientiæ novem Angelorum Choros condidisti, & eos super cœlum empyreum miro ordine collocasti, atque elegantissimè partes universi distribuisti, tu, inquam, qui verus fons luminis & sapientiæ diceris, atque supereminens principium; infundere digneris super intellectus mei tenebras radium tuæ claritatis, duplices à me removens tenebras, peccatum scilicet & ignorantiam, in qua natus sum. Tu qui linguas infantium facis disertas, linguam meam erudias, at-

que in labiis meis gratiam tuæ benedictionis infundas. Da mihi intelligendi acumen, retinendi capacitatem, interpretandi subtilitatem, addiscendi facilitatem, & loquendi gratiam copiosam, ingressum instruas, progressum dirigas, egressum compleas. Per Christum, &c.

### ALIA ORATIO, QUAM

*B. Thomas quotidie flexis genibus recitasse dicitur, divinæ Sapientiæ studio cuivis apprimè conducibilis.*

**C**Oncede mihi, quæso omnipotens & misericors Deus, quæ tibi placita sunt diligenter & ardentè concupiscere, prudenter investigare, veraciter agnoscere, & perfectè adimplere. Ad laudem & gloriam nominis tui ordina statum meum, & quod à me requiris ut faciam, tribue ut sciam, possim & velim, & da exequi ut oportet & expedit salutis animæ meæ.

Via mihi, quæso, ad te sit tuta, recta & consummata, non deficiens inter prospera & adversa; ut in illis non extollar,



& in istis non deprimar, ut in prosperis gratias tibi referam, & in adversis servem patientiam. De nullo gaudeam vel doleam, nisi quod promoveat ad te, vel quod abducatur à te. Nulli placere appetam, vel displicere timeam, nisi tibi. Omnia in charitate da facere, & quod ad cultum tuum non pertinet, quasi mortuum reputare. Actiones meas da peragere, non ex consuetudine, sed ad te referre cum devotione.

Vilescant mihi omnia transitoria propter te, & chara sint mihi omnia tua, & tu, Deus meus, plus quam omnia. Tædeat me gaudii quod est sine te, nec cupiam aliquid quod est extra te. Delectet me omnis labor qui est pro te, & tædiosa sit mihi omnis quies, quæ non est in te.

Frequenter & ferventer da mihi, dulcissime Domine, cor meum ad te dirigere, & defectionem meam cum emendationis proposito dolendo pensare.

Fac me, Deus meus, humilem sine fictione, hilarem sine dissolutione, tri-

stem sine dejectione, maturum sine gravitate, agilem sine levitate, veracem sine duplicitate, te timentem sine desperatione, in te sperantem sine præsumptione, castum sine corruptione, proximum corripere sine indignatione, diligere sine simulatione, ipsumque ædificare verbo & exemplo sine elatione, obedientem sine contradictione, patientem sine murmuratione. Da mihi, dulcissime Jesu, cor pervigil, quod nulla abs te abducatur curiosa cogitatio; da immobile, quod nulla deorsum trahat indigna affectio: da invictum, quod nulla fatigat tribulatio; da liberum, quod nulla sibi vindicet violenta delectatio, & da rectum, quod nulla seorsum obliquet sinistra intentio.

Largire mihi, dulcissime Deus meus, intellectum te cognoscentem, diligentiam te quærentem, sapientiam te invenientem, conversationem tibi placentem, perseverantiam te dulciter & fiducialiter expectantem, fiduciam te felici-

ter amplectentem : tuis pœnis configi per  
pœnitentiam , tuis beneficiis in via , uti  
per gratiam , & gaudiis tuis in patria frui  
per gloriam. Amen.

## AD OBTINENDAM

*Gratiam & opem Sancti Spiritus.*

**V**eni Sancte Spiritus , reple tuorum  
corda fidelium & tui amoris in eis  
ignem accende : qui per diversitatem lin-  
guarum cunctarum gentes in unitate fi-  
dei congregasti.

ψ. Emitte Spiritum tuum & crea-  
buntur.

℞. Et renovabis faciem terræ.

*Oremus.*

**D**eus qui corda fidelium Sancti Spi-  
ritûs illustratione docuisti : da no-  
bis in eodem Spiritu recta sapere , & de  
ejus semper consolatione gaudere. Per  
Christum , &c.

## HYMNUS.

**V**eni Creator Spiritus ,  
Mentes tuorum visita ,  
Imple supernâ gratiâ ,  
Quæ tu creasti pectora.

Qui paraclitus diceris,  
Donum Dei altissimi,  
Fons vivus, ignis, charitas,  
Et spiritalis unctio.

Tu septiformis munere,  
Dextræ Dei tu digitus,  
Tu ritè promissum Patris,  
Sermone ditans guttura.

Accende lumen sensibus,  
Infunde amorem cordibus,  
Infirma nostri corporis,  
Virtute firmans perpeti.

Hostem repellas longius,  
Pacemque dones protinus,  
Ductore sic te prævio,  
Vitemus omne noxium.

Per te sciamus da Patrem,  
Noscamus atque Filium,  
Te utriusque Spiritum  
Credamus omni tempore.

Sit laus Patri cum Filio,  
Sancto simul paraclito,  
Nobisque mittat Filius,  
Charisma S. Spiritus. Amen.

**PRECATIO CUM DOMO,***Vel cubiculo egrederis.*

Abrenuntio tibi Satana, & adhæreo  
tibi Christe, qui es via, veritas & vita.

Vias tuas, Domine, demonstra mihi,  
& semitas tuas edoce me.

Gressus meos dirige secundum elo-  
quium tuum; ut non dominetur mei  
omnis iniustitia.

Perfice gressus meos in semitis tuis:  
ut non moveantur vestigia mea.

*Cum audis signum horæ.*

Maria Mater gratiæ, Mater miseri-  
cordiæ, tu nos ab hoste protege, & ho-  
râ mortis suscipe.

Omnipotens faustam donet mortali-  
bus horam.

Nos cum prole pia benedicat virgo  
Maria. Amen.

*Precatio Templum ingressuri ex Psal. 5.*

Domine, in multitudine misericordiæ  
tuæ introibo in domum tuam, adorabo  
ad templum sanctum tuum, & confite-  
bor nomini tuo.

**AD PULSUM CAMPANÆ***Matutinum, in memoriam Resurrectionis Dominicæ.*

**D**omine Jesu Christe, qui redi-  
 vus ex mortuis diem illum ex-  
 pectatissimum, quem fecit Dominus,  
 mortalibus revexisti; fac me à morte  
 peccatorum excitatum; in novitate vi-  
 tæ ambulare, ut in resurrectione illa  
 in novissimo die, cum manifestata fue-  
 rit vita nostra, & ego tecum manife-  
 ster in gloria. Qui vivis & regnas in sæ-  
 cula sæculorum. Amen.

**AD PULSUM CAMPANÆ***Meridianum, in memoriam mortis Do-  
 minicæ.*

**T**enebræ factæ sunt, dum Christus  
 supplicium mortis pateretur in cru-  
 ce. Et circa horam nonam clamavit vo-  
 ce magna: Deus meus, Deus meus, ut  
 quid dereliquisti me? Et inclinato capi-  
 te emisit spiritum. Et ecce terræ motus  
 factus est magnus, quia mortem Filii  
 Dei mundus sustinere non poterat, &

aperto ejus latere sanguis exivit & aqua,  
in redemptionem salutis nostræ.

Ÿ. Christus factus est pro nobis obediens usque ad mortem.

R. Mortem autem crucis.

*Oremus.*

Respice, quæsumus Domine, super hanc familiam tuam, pro qua Dominus noster Jesus Christus non dubitavit manibus tradi nocentium, & crucis subire tormentum. Qui passus es pro nobis, miserere nostri.

AD PULSUM CAMPANÆ.

*Vespertinum.*

Suscipe, quæso, sancta Virgo Mater, ex me verbum quondam tibi cælitus ab Angelo denuntiatum. Ave gratiâ plena, Dominus tecum: benedicta tu in mulieribus, & benedictus fructus ventris tui Jesus Christus, Amen. Ipse qui te plenam fecit gratiâ, nos pro sua dirigat clementia, ut in salutis pergentes via, in perpetua coronemur gloria.

Deus, qui de B. Mariæ Virginis utero

Verbum tuum, Angelo nuntiante, carnem suscipere voluisti: præsta supplicibus tuis, ut qui verè eam Dei genitricem credimus, ejus apud te intercessionibus adjuvemur. Per eundem Christum Dominum nostrum. Amen.

*Admonitio.*

**N**Otandum ad matutinum & meridianum pulsus, præter memoriam resurrectionis & passionis Dominicæ, etiam servari incarnationis Christi memoriam, eo quòd hoc mysterium sit omnium aliorum principium: & ignoretur qua parte diei Christi incarnatio per Angelum B. Mariæ sit nuntiata: eamque ob causam multis in locis usitatissimum est, tam manè quàm meridiè & vesperi ter recitare Angelicam salutationem in hunc modum.

Angelus Domini nuntiavit Mariæ, & concepit de Spiritu Sancto. Ave Maria, &c.

Ecce Ancilla Domini, fiat mihi secundum verbum tuum. Ave Maria, &c.



Verbum caro factum est, & habitavit in nobis. Ave Maria, &c.

Alias preces, diversis personis, temporibus & necessitatibus accommodatas, petere licebit ex Cœlesti Palmeto, aliisque similibus piis libellis.

## MEDITATIO

### Vespertina.

**V**Esperi, priusquam te ad quietem componas, conscientiæ tuæ examen præmittes. Quandoquidem (ut rectè admonet D. Chrysost.) optimum est, ut non singulis hebdomadis modò, verùm quotidie etiam unusquisque seipsum considerans ab anima sua omnem negligentiam repellat, & bonorum possessionem acquirat. Neque incommode cecinit Poëta.

*Non prius in dulcem declines lumina  
somnum,*

*Omnia quàm longè reputaveris acta  
diei.*

Modus autem istius examinis his punctis continebitur :

Quorum primum est, ut, postquam ad orandum te composueris, humiliter gratias agas Deo pro omnibus beneficiis, quibus hactenus te cumulavit, atque pro his initio, quæ tibi cum ceteris hominibus communia sunt, quod videlicet te creaturam ratione præditam condiderit, ad imaginem & similitudinem suam, quod immensis laboribus, doloribus, & sanguine denique suo, te ex inferni faucibus (quibus tuis meritis destinatus eras) eripuerit: quodque vitam æternam tibi, si præceptis ejus morem gesseris, largiri paratus sit, atque promiserit, &c. Deinde ea, quæ peculiariter tibi, non autem reliquis omnibus, concessa sunt, expendens, gratias ages, quòd te in Spiritu & aqua baptizaverit, ignorantem docuerit, ac fidei lumine illustraverit, ab hæresi te servaverit, parentes præceptoresque Catholicos & pios, tuique amantes dederit; maximam semper occasionem obtulerit Deum ex animo diligendi, eique serviendi: atque cum Angelos nobilif-

simos ob unam superbiam voluntatem è  
cœlo, Adamum autem ob inobedientiæ  
peccatum è Paradiso ejecerit, nec non &  
plurimos homines nunc ob peccata, tuis  
tamen minora, ad profundum inferni  
justissimè deturbarit, perpetuis ignibus  
cruciandos, tibi tamen hætenus peper-  
cerit, toties in peccata lapsum clemen-  
ter eripuerit, peccataque remiserit, quin  
imò pretioso suo illo corpore & sangui-  
ne cibaverit, die quoque hodierno jam  
exacto, in quo multi propter peccata ad  
inferos præcipitati sunt, custodierit. Hæc  
& similia plura in te Dei beneficia agnos-  
ces, maximè tamen peculiares gratias  
agas de beneficiis illo die peculiariter  
tibi impensis.

Secundum, ut deinde preceris pro gra-  
tia, quâ recordari, deslere, expellere, &  
expiare vitia illa possis, in quæ die illo ex  
negligentia supina, vel malitia, incidisti.

Tertium, ut cogites quid ab ea hora,  
quâ mane surrexeris, ad hoc usque tem-  
pus commiseris, singulas horas percur-

rens, quibus partim orasti, partim studuisti, cum aliis domi forisque conversatus es.

Videbis an Deum vel proximum cogitatione, verbo, vel opere, ut omissione, seu negligentia offenderis, utpote tempus negligenter transigendo; frigidè atque parum devotè orando, & id genus alia, quæ tui sunt officii, negligendo.

Quartò, ut ex consideratione tantæ tuæ socordiae, quâ tam frequenter in eadem laberis vitia excites tibi dolorem & metum; cogitans iniquum admodum esse, clementissimum illum Dominum tuum tam facilè ac levi de causa offendere, & teipsum tantis animæ tuæ periculis exponere. Perpendas etiam sedulò, si ex vita tibi hac nocte migrandum foret, quale esses judicium expectaturus, de omni etiam verbo otioso rationem redditurus, & ad quem locum deducendus. Proinde à Domino tuo sollicitè veniam posce delictorum, promittens te majori diligentia, vitæque emenda-

tione, commissa & neglecta pro virili tuo compensaturum; atque ora, ut si hac nocte hinc te discedere velit, clementer pro sua immensa misericordia tecum agat. Sin velit diutiùs vitam tuam prorogare, gratiam largiatur sobriè, justè, & piè vivendi in hoc sæculo. Finitâ tunc Oratione Dominicâ, Angelicâ Salutatione, & Apostolorum Symbolo, hunc Hymnum cum precatione Ecclesiæ subjunges.

HYMNUS.

**C**hriste, qui lux es & dies,  
Noctis tenebras detegis,  
Lucisque lumen crederis,  
Lumen beatum prædicans.

Precamur sancte Domine,  
Defende nos in hac nocte,  
Sit nobis in te requies,  
Quietam noctem tribue.

Ne gravis somnus irruat,  
Nec hostis nos surripiat,  
Nec caro illi consentiens  
Nos tibi reos statuatur.

Oculi somnum capiant,  
 Cor ad te semper vigilet,  
 Dextra tua protegat  
 Famulos qui te diligunt.

Defensor noster aspice,  
 Insidiantes reprime:  
 Gubernatus famulos,  
 Quos sanguine mercatus es.  
 Memento Nostri Domine.

In gravi isto corpore:  
 Qui es defensor animæ,  
 Adesto nobis Domine.

Deo Patri sit gloria,  
 Ejusque soli Filio,  
 Cum Spiritu paraclito,  
 Et nunc & in perpetuum. Amen.

Salva nos, Domine, vigilantes, cu-  
 stodi nos dormientes: ut vigilemus cum  
 Christo, & requiescamus in pace.

*Oratio.*

Visita, quæsumus, Domine, habita-  
 tionem istam, & omnes insidias inimici  
 ab ea longè repelle: Angeli tui sancti  
 habitent in ea, qui nos in pace custo-

diant, & benedictio ✠ tua sit super nos  
semper. Per Dominum nostrum, &c.

*De Contritionis usu.*

**C**ontritio tanti est momenti, ut  
quantumcumque gravissimum  
peccatorem in Dei gratia reponat, &  
ad salutem sufficiat, si modò habeat pro-  
positum confitendi, ideoque ejus Actum  
hâc subjicimus. Est verò Contritio, per-  
fectus animi dolor ob Deum offensum,  
quem ut summum bonum summè & su-  
per omnia diligere tenemur. Attritio ve-  
rò oritur ex timore vel fœditate peccati,  
aut simili consideratione, neque absque  
Sacramento per se sufficit ad salutem.  
Vehementer itaque commendatur à vi-  
ris doctis & piis contritionis frequentior  
usus, potissimum manè, ut Deo recon-  
ciliati, opera nostra, aliàs mortua, vitæ  
æternæ meritoria sint. Secundò, vesperi  
in examine conscientiae contra repenti-  
nam mortem. Tertiò, post peccatum gra-  
vius admissum, ne inimici Dei perma-  
neamus. Quartò, ante omnem oratio-

nem: non enim est speciosa laus in ore peccatoris. Quintò, in omni periculo mortis.

*Actus Contritionis.*

**D**omine Jesu Christe, verè Deus & homo, creator pariter ac redemptor, doleo ex intimo corde me offendisse tuam divinam Majestatem, quia tu es Deus meus & omnia, quem super omnia diligo & colo.

Proinde firmiter statuo ac propono me non ampliùs te offensurum, sed omnes peccandi occasiones pro viribus devitaturum: insuper de noxis me ritè confessurum, & pœnitentiam, quæcumque imponetur, impleturum: ad pleniorè verò satisfactionem, hodiè tibi me ipsum offero, vitam meam, & mea omnia, & omnes labores meos. Et quemadmodum rogo te suppliciter, & flagito veniam delictorum meorum, ita confido me eam impetraturum per infinitam misericordiam ac benignitatem tuam, per merita quoque pretiosiss-



fimi sanguinis ac sanctissimæ passionis  
tuæ, daturum te quoque gratiam emen-  
dandi vitam meam & in bono usque ad  
finem perseverandi. Amen.

JESUS.

Tetrastichon de Nomine Jesu.

*Dulce tuum nostro scribas in pectore  
nomen:*

*Namque tuo constat nomine nostra salus.  
Illi triste nihil cadit umquam, mitis  
Jesu,*

*Qui velit usque tui nominis esse memor.*

---

ORATIONES

*In Schola quotidie ante lectionem di-  
cenda.*

DIE DOMINICO

*Ad Deum Patrem.*

In nomine Patris, & Filii, & Spiritus  
Sancti. Amen.

Benedictus sit Deus Pater, unigeni-  
tusque Dei Filius, Sanctus quoque Spi-  
ritus, quia fecit nobiscum misericordiam  
suam.

**C**lementissime Pater, infunde nobis per meritum Christi Filii tui, Spiritus Sancti gratiam, quâ intellectus noster liberalibus disciplinis plenius illustretur, quas in divinum tuum honorem aliquando, & spirituales nostram utilitatem, convertere possimus. Qui vivis & regnas Deus per omnia sæcula sæculorum. Amen.

### DIE LUNÆ.

In nomine Patris, &c.

O Sapientia, que ex ore Altissimi prodisti, attingens à fine usque ad finem fortiter suaviterque omnia disponens; veni ad docendum nos viam prudentiæ.

**V**erbum Patris æternum, & sapientiæ fons effusissime Domine Jesu Christe, docilitatem mentibus nostris & intelligentiæ lumen infunde, ut feliciter nobis cedant hæc litterarum studia; quibus adjuti ad clariorem agnitionem æternæ Veritatis, & perfectum amorem bonitatis tuæ, pervenire possimus. Qui vivis & regnas Deus in sæcula sæculorum. Amen.

**DIE MARTIS.***Ad Spiritum Sanctum.***In nomine Patris, &c.**

Veni Sancte Spiritus, reple tuorum  
corda fidelium & tui amoris in eis ig-  
nem accende: qui per diversitatem,  
&c. pag. 127.

**D**Eus, cui omne cor patet, & om-  
nis voluntas loquitur, & quem  
nullum latet secretum, purifica per in-  
fusionem Sancti Spiritus cogitationes  
cordis nostri: ut te perfectè diligere, &  
dignè laudare, omniaquè nostra studia  
semper ad tuam gloriàm referre valea-  
mus. Qui vivis & regnas, &c.

**DIE MERCURII***Ad omnes Sanctos.***In nomine Patris, &c.**

O quàm gloriosum est regnum, in  
quo cum Christo gaudent omnes Sancti,  
amicti stolis albis, sequuntur Agnum  
quocumque ierit, laudantes Deum,  
& dicentes: Benedictio & claritas, & sa-  
pientia, gratiarum actio, honor, virtus,

& fortitudo Deo nostro in sæcula sæculorum. Amen.

**O**Mnes Sancti tui, quæsumus, Domine, nos ubique adjuvent; ut, dum eorum merita recolimus, patrocinia sentiamus, Sancta Maria & omnes Sancti intercedant pro nobis ad Dominum ut nos mereamur ab eo in studiis nostris juvari & salvari. Qui vivis & regnas, cum Deo Patre, &c.

## DIE JOVIS

### *De venerabili Sacramento.*

In nomine Patris, &c.

**O** Sacrum Convivium, in quo Christus sumitur, recolitur memoria passionis ejus, mens impletur gratiâ, & futuræ gloriæ nobis pignus datur.

**O** Quam suavis est Domine, Spiritus tuus! qui ut dulcedinem tuam in filios demonstrares, pane suavissimo de cælo præstito, esurientes replebis bonis; fastidiosos divites dimittis inanes. Tuâ nos Domine, quæsumus, gratiâ semper præ-

præveniat, & sequatur, ac studiis nostris bonisque operibus jugiter præstet esse intentos. Per Christum Dominum nostrum. Amen.

## DIE VENERIS

### *De Beneficio Redemptionis.*

Humiliavit semetipsum Dominus noster Jesus Christus usque ad mortem, mortem autem crucis: propter quod & Deus exaltavit illum, & donavit illi nomen quod est super omne nomen.

**D**omine Jesu Christe, qui pro mundi redemptione, ut, qui in tenebris erat, illuminaretur, mortem in crucis patibulo sustinuisti, illam, quæsumus, lucem in animas nostras, corporaque infunde, per quam ad æternam lucem, & te veram sapientiam pervenire mereamur. Qui vivis & regnas Deus, &c.

## DIE SABBATHI

### *Ad B. Virginem.*

In nomine Patris, & Filii, & Spiritus Sancti, Amen.

Sub tuum præsidium confugimus.

Sancta Dei genitrix, nostras deprecationes ne despicias in necessitatibus nostris, sed à periculis cunctis libera nos semper Virgo gloriosa & benedicta, Domina nostra, mediatrix nostra, Advocata nostra, tuo Filio nos reconcilia, tuo Filio nos commenda, tuo Filio nos repræsenta.

**O**mnipotens sempiterne Deus, qui curam de omnibus in te confidentibus semper habes: præsta quæsumus ut per intercessionem Beatissimæ Virginis Mariæ Matris unigeniti Filii tui Domini nostri Jesu Christi, tuam in nostris studiis & omnibus necessitatibus gratiam sentiamus. Per eundem Dominum nostrum, &c.

## SEPTEM PSALMI

*Pœnitentiales cum Litanis dicuntur  
flexis genibus.*

*Antiph. Ne reminiscaris.*

*Psalm. 6.*

**D**omine, ne in furore tuo arguas me: neque in ira tua corripas me.

Miserere mei Domine, quoniam infirmus sum : sana me Domine, quoniam conturbata sunt ossa mea.

Et anima mea turbata est valde : sed tu Domine, usquequò ?

Convertere Domine, & eripe animam meam : saluum me fac propter misericordiam tuam.

Quoniam non est in morte qui memor sit tui : in inferno autem quis confitebitur tibi.

Laboravi in gemitu meo, lavabo per singulas noctes lectum meum : lacrymis meis stratum meum rigabo.

Turbatus est à furore oculus meus : inveteravi inter omnes inimicos meos.

Discedite à me omnes qui operamini iniquitatem : quoniam exaudivit Dominus vocem fletus mei.

Exaudivit Dominus deprecationem meam : Dominus orationem meam suscepit.

Erubescant & conturbentur vehementer

ter omnes inimici mei : convertantur , & erubescant valdè velociter.

Gloria Patri , & Filio , &c.

Sicut erat in principio , &c.

*Psalm. 31.*

**B**Eati quorum remissæ sunt iniquitates , & quorum tecta sunt peccata.

Beatus vir cui non imputavit Dominus peccatum : nec est in spiritu ejus dolus.

Quoniam tacui inveteraverunt ossa mea : dum clamarem totâ die.

Quoniam die ac nocte gravata est super me manus tua : conversus sum in ærumna mea , dum configitur spina.

Delictum meum cognitum tibi feci : & injustitiam meam non abscondi.

Dixi , confitebor adversum me injustitiam meam Domino : & tu remisisti impietatem peccati mei.

Pro hac orabit ad te omnis Sanctus : in tempore opportuno.

Verumtamen in diluvio aquarum multarum , ad eum non approximabunt.

Tu es refugium meum à tribulatione,



quæ circumdedit me : exultatio mea,  
erue me à circumdantibus me.

Intellectum tibi dabo, & instruam te  
in via hac quâ gradieris : firmabo super  
te oculos meos.

Nolite fieri sicut equus & mulus :  
quibus non est intellectus.

In camo & fræno maxillas eorum  
constringe : qui non approximant ad te.

Multa flagella peccatoris : sperantem  
autem in Domino misericordia circum-  
dabit.

Lætamini in Domino, & exultate  
justi : gloriamini omnes recti corde.

Gloria Patri, & Filio, &c.

Sicut erat in principio, &c.

*Psalm. 37.*

**D**omine, ne in furore tuo arguas  
me : neque in ira tua corripias me.

Quoniam sagittæ tuæ infixæ sunt mihi :  
& confirmasti super me manum tuam.

Non est sanitas in carne mea à facie  
iræ tuæ : non est pax ossibus meis à fa-  
cie peccatorum meorum.

Quoniam iniquitates meæ supergressæ sunt caput meum : & sicut onus grave gravatæ sunt super me.

Putruerunt & corruptæ sunt cicatrices meæ : à facie insipientiæ meæ.

Miser factus sum , & curvatus sum usque in finem : tota die contristatus ingrediebar.

Quoniam lumbi mei impleti sunt illusionibus : & non est sanitas in carne mea.

Afflictus sum & humiliatus sum nimis : rugiebam à gemitu cordis mei.

Domine ante te omne desiderium meum , & gemitus meus à te non est absconditus.

Cor meum conturbatum est , dereliquit me virtus mea : & lumen oculorum meorum , & ipsum non est mecum.

Amici mei & proximi mei adversum me appropinquaverunt & steterunt.

Et qui juxta me erant , de longè steterunt : & vim faciebant , qui quærebant animam meam.

Et qui inquirebant mala mihi ; locuti

sunt vanitates : & dolos tota die meditantur.

Ego autem tamquam surdus non audiebam : & sicut mutus non aperiens os suum.

Et factus sum sicut homo non audiens : & non habens in ore suo redargutiones.

Quoniam in te, Domine, speravi : tu exaudies me, Domine Deus meus.

Quia dixi, nequando supergaudeant mihi inimici mei : & dum commoven-  
tur pedes mei, super me magna locuti  
sunt.

Quoniam ego in flagella paratus sum :  
& dolor meus in conspectu meo semper.

Quoniam iniquitatem meam annuntia-  
bo : & cogitabo pro peccato meo.

Inimici autem mei vivunt, & con-  
firmati sunt super me : & multiplicati  
sunt qui oderunt me iniquè.

Qui retribuunt mala pro bonis, detra-  
hebant mihi : quoniam sequebar bonita-  
tem.

Ne derelinquas me Domine Deus  
meus : ne discefferis à me. K 4

Intende in adjutorium meum : Domine Deus salutis meæ.

Gloria Patri, & Filio, &c.

Sicut erat in principio, &c.

*Psalm. 50.*

**M**iserere mei, Deus : secundum magnam misericordiam tuam.

Et secundum multitudinem miserationum tuarum : dele iniquitatem meam.

Amplius lava me ab iniquitate mea : & à peccato meo munda me.

Quoniam iniquitatem meam ego cognosco, & peccatum meum contra me est semper.

Tibi soli peccavi, & malum coram te feci, ut justificeris in sermonibus tuis, & vincas cum judicaris.

Ecce enim in iniquitatibus conceptus sum, & in peccatis concepit me mater mea.

Ecce enim veritatem dilexisti : incerta & occulta sapientiæ tuæ manifestasti mihi.

Asperges me hyssopo, & mundabor : lavabis me, & super nivem dealbabor.

Auditui meo dabis gaudium & lætiti-  
tiam, & exultabunt ossa humiliata.

Averte faciem tuam à peccatis meis :  
& omnes iniquitates meas dele.

Cor mundum crea in me Deus : & Spi-  
ritum rectum innova in visceribus meis.

Ne projicias me à facie tua : & Spi-  
ritum Sanctum tuum ne auferas à me.

Redde mihi lætitiā salutaris tui : &  
Spiritu principali confirma me.

Docebo iniquos vias tuas, & impii ad  
te convertentur.

Libera me de Sanguinibus Deus,  
Deus salutis meæ : & exultabit lingua  
mea justitiā tuam.

Domine labia mea aperies : & os meum  
annuntiabit laudem tuam.

Quoniam si voluisses sacrificium de-  
dissem utique : holocaustis non delecta-  
beris.

Sacrificium Deo spiritus contribula-  
tus : cor contritum & humiliatum Deus  
non despicies.

Benignè fac, Domine, in bona volun-

tate tua Sion, ut ædificentur muri Jerusalem.

Tunc acceptabis Sacrificium justitiæ, oblationes & holocausta: tunc imponent super Altare tuum vitulos.

Gloria Patri, &c.

Sicut erat in principio, &c.

*Psalm. 101.*

**D**omine exaudi orationem meam:  
& clamor meus ad te veniat.

Non avertas faciem tuam à me: in quacumque die tribulor inclina ad me aurem tuam.

In quacumque die invocavero te: velociter exaudi me.

Quia defecerunt sicut fumus dies mei: & ossa mea sicut cremium aruerunt.

Percussus sum ut fœnum, & aruit cor meum: quia oblitus sum comedere panem meum.

A voce gemitus mei, adhæsit os meum carni meæ.

Similis factus sum pellicano solitudi-

nis : factus sum sicut nycticorax in domicilio.

Vigilavi : & factus sum sicut passer solitarius in tecto.

Totâ die exprobrabant mihi inimici mei : & qui laudabant me adversum me jurabant.

Quia cinerem tamquam panem manducabam , & potum meum cum fletu miscebam.

A facie iræ & indignationis tuæ : quia elevans allisisti me.

Dies mei sicut umbra declinaverunt : & ego sicut fœnum arui.

Tu autem Domine , in æternum permanes : memoriale tuum in generationem & generationem.

Tu exurgens misereberis Sion : quia tempus miserendi ejus , quia venit tempus.

Quoniam placuerunt servis tuis lapides ejus , & terræ ejus miserebuntur.

Et timebunt gentes nomen tuum Domine , & omnes Reges terræ gloriam tuam.

Quia ædificavit Dominus Sion : & videbitur in gloria sua.

Respexit in orationem humilium , & non sprexit precem eorum.

Scribantur hæc in generatione altera : & populus qui creabitur laudabit Dominum.

Quia prospexit de excelso Sancto suo : Dominus de cœlo in terram aspexit.

Ut audiret gemitus compeditorum : ut solveret filios interemptorum.

Ut annuntient in Sion nomen Domini : & laudem ejus in Jerusalem.

In conveniendo populos in unum : & Reges ut serviant Domino.

Respondit ei in via virtutis suæ : paucitatem dierum meorum nuntia mihi.

Ne revoces me in dimidio dierum meorum : in generationem & generationem anni tui.

Initio tu , Domine , terram fundasti : & opera manuum tuarum sunt cœli.

Ipsi peribunt , tu autem permanes : & omnes sicut vestimentum veterascent.



Et sicut opertorium mutabis eos, & mutabuntur: tu autem idem ipse es, & anni tui non deficient.

Filii servorum tuorum habitabunt: & semen eorum in sæculum dirigetur.

Gloria Patri, &c.

Sicut erat in principio, &c.

*Psalm. 129.*

**D**E Profundis clamavi ad te Domine: Domine exaudi vocem meam.

Fiant aures tuæ intendentes in vocem deprecationis meæ.

Si iniquitates observaveris Domine: Domine quis sustinebit.

Quia apud te propitiatio est: & propter legem tuam sustinui te Domine.

Sustinuit anima mea in verbo ejus: speravit anima mea in Domino.

A custodia matutina usque ad noctem, speret Israël in Domino.

Quia apud Dominum misericordia: & copiosa apud eum redemptio.

Et ipse redimet Israël: ex omnibus iniquitatibus ejus.

Gloria Patri, &c.

Sicut erat in principio, &c.

*Psalm. 142.*

**D**omine exaudi orationem meam :  
auribus percipe obsecrationem  
meam in veritate tua : exaudi me in tua  
justitia.

Et non intres in iudicium cum ser-  
vo tuo : quia non justificabitur in con-  
spectu tuo omnis vivens.

Quia persecutus est inimicus animam  
meam : humiliavit in terra vitam meam.

Collocavit me in obscuris sicut mor-  
tuos sæculi : & anxius est super me spi-  
ritus meus, in me turbatum est cor  
meum.

Memor fui dierum antiquorum, me-  
ditatus sum in omnibus operibus tuis :  
in factis manuum tuarum meditabar.

Expandi manus meas ad te : anima  
mea sicut terra sine aqua tibi.

Velociter exaudi me Domine : defe-  
cit spiritus meus.

Non avertas faciem tuam à me & si-  
milis ero descendentibus in lacum.

Auditam fac mihi manè misericordiam tuam: quia in te speravi.

Notam fac mihi viam in qua ambulem: quia ad te levavi animam meam.

Eripe me de inimicis meis Domine, ad te confugi: doce me facere voluntatem tuam, quia Deus meus es tu.

Spiritus tuus bonus deducet me in terram rectam, propter nomen tuum Domine, vivificabis me in æquitate tua.

Educes de tribulatione animam meam: & in misericordia tua disperdes omnes inimicos meos.

Et perdes omnes qui tribulant animam meam: quoniam ego servus tuus sum.

Gloria Patri, & Filio, &c.

Sicut erat in principio, &c.

*Antiph.* Ne reminiscaris, Domine, delicta nostra, vel parentum nostrorum; neque vindictam sumas de peccatis nostris.

L I T A N I Æ.

**K**Yrie, eleïson. Christe, eleïson.  
KYrie, eleïson. Christe, audi nos.  
Christe, exaudi nos.

Pater de Cœlis Deus, miserere nobis.

Fili redemptor mundi Deus, mis. nob.

Spiritus Sancte Deus, miserere nobis.

Sancta Trinitas unus Deus, mis. nobis.

Sancta Maria, ora pro nobis.

Sancta Dei genitrix, ora.

Sancta Virgo Virginum, ora.

Sancte Michaël, ora.

Sancte Gabriël, ora.

Sancte Raphaël, ora.

Omnes Sancti Angeli & Archang, orate.

Omnes Sancti Beatorum Spirituum Ordines, orate.

Sancte Joannes Baptista ora.

Omnes Sancti Patriarchæ & Prophetæ,  
orate pro nobis.

Sancte Petre, ora.

Sancte Paule, ora.

Sancte Andrea, ora.

Sancte Jacobe, ora.

Sancte Joannes, ora.

Sancte Thoma, ora.

Sancte Jacobe, ora.

Sancte philippe, ora.

Sancte

*Litania.*

161

Sancte Bartholomæe,	ora.
Sancte Matthæe,	ora.
Sancte Simon,	ora.
Sancte Thadæe,	ora.
Sancte Matthia,	ora.
Sancte Barnaba,	ora.
Sancte Luca,	ora.
Sancte Marce,	ora.
Omnes Sancti Apostoli & Evangelistiæ,	orate pro nobis.
Omnes Sancti Discipuli Domini,	orate.
Omnes Sancti Innocentes,	orate.
Sancte Stephane,	ora.
Sancte Laurenti,	ora.
Sancte Vincenti,	ora.
Sancti Fabiane & Sebastiane,	orate.
Sancti Joannes & Paule,	orate.
Sancti Cosma & Damiane,	orate.
Sancti Gervasi & Protasi,	orate.
Omnes Sancti Martyres,	orate.
Sancte Silvester,	ora.
Sancte Gregori,	ora.
Sancte Ambrosi,	ora.
Sancte Augustine,	ora.

L

Sancte Hieronyme,	ora.
Sancte Martine,	ora.
Sancte Nicolae,	ora.
Omnes sancti Pontifices & Confesso-	
res,	orate pro nobis.
Omnes sancti Doctores,	orate.
Sancte Antoni,	ora.
Sancte Benedicte,	ora.
Sancte Bernarde,	ora.
Sancte Dominice,	ora.
Sancte Francisce,	ora.
Omnes sancti Sacerdotes & Levitæ,	orati.
Omnes sancti Monachi & Eremitæ,	orat.
Sancta Maria Magdalena,	ora.
Sancta Agatha,	ora.
Sancta Lucia,	ora.
Sancta Agnes,	ora.
Sancta Cæcilia,	ora.
Sancta Catharina,	ora.
Sancta Anastasia,	ora.
Omnes sanctæ Virgines & Viduæ,	orat.
Omnes Sancti & Sanctæ Dei,	interce-
dite pro nobis.	
Propitius esto, parce nobis Domine.	

Propitius esto , exaudi nos Domine.

Ab omni malo , libera nos Domine.

Ab omni peccato , libera.

A subitanea & improvisa morte , libera.

Ab insidiis diaboli , libera.

Ab ira , & odio ; & omni mala volun-

tate , libera.

A spiritu fornicationis , libera.

A fulgure & tempestate , libera.

A morte perpetua , libera.

Per mysterium sanctæ incarnationis

tuæ , libera nos Domine.

Per Adventum tuum , libera nos Dom.

Per Nativitatem tuam , libera.

Per Baptismum & sanctum jejunium

tuum , libera.

Per Crucem & Passionem tuam , libera.

Per Mortem & sepulturam tuam , libera.

Per sanctam resurrectionem tuam , liber.

Per admirabilem Ascensionem tuam , lib.

Per Adventum Spiritûs Sancti paracli-

ti , libera nos Domine.

In die judicii , libera nos Domine.

Peccatores , te rogamus audi nos.

Ut nobis parcas , te rogamus audi nos.

Ut nobis indulgeas , te rogamus audi.

Ut ad veram pœnitentiam nos perducere digneris , te rogamus audi nos.

Ut Ecclesiam tuam sanctam regere & conservare digneris , te rog. aud. nos.

Ut Domnum Apostolicum , & omnes Ecclesiasticos Ordines in sancta religione conservare digneris , te rogam.

Ut inimicos sanctæ Ecclesiæ humiliare digneris , te rogamus audi nos.

Ut Regibus & Principibus Christianis pacem & veram concordiam donare digneris , te rogamus audi nos.

Ut cuncto populo Christiano pacem & unitatem largiri digneris , te rogamus audi nos.

Ut nosmetipsos in tuo sancto servitio confortare & conservare digneris , te rogamus audi nos.

Ut mentes nostras ad cœlestia desideria erigas , te rogamus audi nos.

Ut omnibus benefactoribus nostris sempiterna bona retribuas , te rogamus audi nos.



Ut animas nostras, fratrum, propinquorum & benefactorum nostrorum, ab æterna damnatione eripias, te rog.

Ut fructus terræ dare & conservare digneris, te rogamus audi nos.

Ut omnibus fidelibus defunctis requiem æternam donare digneris, te rogamus.

Ut nos exaudire digneris, te rogamus.

Fili Dei, te rogamus audi nos.

Agnus Dei, qui tollis peccata mundi, parce nobis Domine.

Agnus Dei, qui tollis peccata mundi, exaudi nos Domine.

Agnus Dei, qui tollis peccata mundi, miserere nobis.

Christe, audis nos. Christe, exaudi nos.

Kyrie eleison. Christe eleison.

*Pater noster*, secreto.

ψ. Et ne nos inducas in tentationem.

℞. Sed libera nos à malo.

*Psal. 69.*

**D**Eus in adiutorium meum intende;  
Domine ad adjuvandum me festina.

Confundantur & revereantur : qui  
quærunt animam meam.

Avertantur retrorsum & erubescant :  
qui volunt mihi mala.

Avertantur statim erubescences : qui  
dicunt mihi , euge , euge.

Exultent & lætentur in te omnes qui  
quærunt te : & dicant semper , Magnifi-  
cetur Dominus qui diligunt salutare  
tuum.

Ego verò egenus & pauper sum : Deus  
adjuva me.

Adjutor meus & liberator meus es  
tu : Domine ne moreris.

Gloria Patri , & Filio , & Spiritui  
Sancto.

Sicut erat in principio , & nunc &  
semper , & in sæcula sæculorum.  
Amen.

ψ. Salvos fac servos tuos

℞. Deus meus , sperantes in te.

ψ. Esto nobis Domine , turris forti-  
tudinis.

℞. A facie inimici.

Ÿ. Nihil proficiat inimicus in nobis.

℞. Et filius iniquitatis non apponat nocere nobis.

Ÿ. Domine, non secundum peccata nostra facias nobis.

℞. Neque secundum iniquitates nostras retribuas nobis.

Ÿ. Oremus pro Pontifice nostro N.

℞. Dominus conservet eum, & vivificet eum & Beatum faciat eum in terra: & non tradat eum in animam inimicorum ejus.

Ÿ. Oremus pro benefactoribus nostris.

℞. Retribuere dignare, Domine, omnibus nobis bona facientibus propter nomen tuum vitam æternam.

Ÿ. Oremus pro fidelibus defunctis.

℞. Requiem æternam dona eis Domine, & lux perpetua luceat eis.

Ÿ. Requiescant in Pace. ℞. Amen.

Ÿ. Pro Fratribus nostris absentibus.

℞. Salvos fac servos tuos, Deus meus, sperantes in te.

Ÿ. Mitte eis, Domine, auxilium de Sancto.

R. Et de Sion tuere eos.

Ÿ. Domine exaudi orationem meam.

R. Et clamor meus ad te veniat.

### O R E M U S.

**D**Eus cui proprium est misereri semper & parcere, suscipe deprecationem nostram, ut nos & omnes famulos tuos, quos delictorum catena constringit, miseratio tuæ pietatis clementer absolvat.

**E**Xaudi quæsumus, Domine, supplicum preces, & confitentium tibi parce peccatis, ut pariter nobis indulgentiam tribuas benignus & pacem.

**I**neffabilem nobis, Domine, misericordiam tuam clementer ostende: ut simul nos & à peccatis omnibus exuas, & à pœnis, quas pro his meremur, eripias.

**D**Eus, qui culpâ offenderis, pœnitentiâ placaris: preces populi tui supplicantis propitius respice: & flagella tuæ iracundiæ, quæ pro peccatis nostris meremur, averte.

**O**Mnipotens sempiterne Deus, miserere famulo tuo Pontifici nostro N. dirige eum secundum tuam clementiam in viam salutis æternæ; ut, te donante tibi placita cupiat, & tota virtute perficiat.

**D**Eus à quo Sancta desideria, recta consilia, & iusta sunt opera, da servis tuis illam quam mundus dare non potest pacem, ut & corda nostra mandatis tuis dedita, & hostium sublata formidine, tempora sint tua protectione tranquilla.

**U**Re igne Sancti Spiritus renes nostros, & cor nostrum, Domine; ut tibi casto corpore serviamus, & mundo corde placeamus.

**F**idelium Deus, omnium conditor & redemptor, animabus famularumque tuarum remissionem cunctorum tribue peccatorum; ut indulgentiam, quam semper optaverunt, piis supplicationibus consequantur.

**A**ctiones nostras quæsumus Domine, aspirando præveni, & adjuvando prosequere, ut cuncta nostra oratio & operatio à te semper incipiat, & per te cœpta finiatur.

**O**mnipotens sempiterne Deus, qui vivorum dominaris simul & mortuorum, omniumque misereris, quos tuos fide & opere futuros esse prænocis, te supplices exoramus, ut pro quibus effundere preces decrevimus, quosque vel præsens sæculum adhuc in carne retinet, vel futurum jam exutos corpore suscepit, intercedentibus omnibus Sanctis tuis, pietatis tuæ clementiâ, omnium delictorum suorum veniam consequantur. Per Dominum nostrum Jesum Christum Filium tuum, qui tecum vivit &c.

ψ. Domine exaudi orationem meam.

℞. Et clamor meus ad te veniat.

ψ. Exaudiat nos omnipotens & misericors Dominus. ℞. Amen.

ψ. Et fidelium animæ per misericordiam Dei requiescant in pace. ℞. Amen.

## LITANIÆ

*B. Virginis Lauretanæ.***K** Yrie eleison.  
Christe eleison.

Kyrie eleison.

Christe, audi nos

Christe, exaudi nos.

Pater de cœlis Deus, miserere nobis.

Fili redemptor mundi Deus, miserere  
nobis.

Spiritus Sancte Deus, miserere nobis.

Sancta Trinitas unus Deus, miserere  
nobis.

Sancta Maria, ora pro nobis.

Sancta Dei genitrix,

Sancta Virgo Virginum,

Mater Christi,

Mater divinæ gratiæ,

Mater purissima,

Mater castissima,

Mater inviolata,

Mater intemerata,

Mater amabilis,

Mater admirabilis,

Orapro nobis.

Mater Creatoris,  
Mater Salvatoris,  
Virgo prudentissima,  
Virgo veneranda,  
Virgo prædicanda,  
Virgo potens,  
Virgo clemens,  
Virgo fidelis,  
Speculum justitiæ,  
Sedes sapientiæ,  
Causa nostræ lætitiæ,  
Vas spirituale,  
Vas honorabile,  
Vas insigne devotionis,  
Rosa mystica,  
Turris Davidica,  
Turris eburnea,  
Domus aurea,  
Fœderis arca,  
Janua cœli,  
Stella matutina,  
Salus infirmorum,  
Refugium peccatorum,  
Consolatrix afflictorum,

Ora pro nobis.



Auxilium Christianorum ,  
Regina Angelorum ,  
Regina Patriarcharum ,  
Regina Prophetarum ,  
Regina Apostolorum ,  
Regina Martyrum ,  
Regina Confessorum ,  
Regina Virginum ,  
Regina Sanctorum omnium ,  
Agnus Dei, qui tollis peccata mundi ,  
parce nobis Domine.  
Agnus Dei, qui tollis peccata mundi ,  
exaudi nos Domine.  
Agnus Dei, qui tollis peccata mundi ,  
miserere nobis.

ψ. Orapro nobis Sancta Dei genitrix.

℟. Ut digni efficiamur promissionibus Christi.

O R E M U S.

**G**ratiam tuam, quæsumus Domine,  
mentibus nostris infunde; ut qui  
Angelo nuntiante Christi filii tui incarnationem cognovimus, per passionem  
ejus & crucem ad resurrectionis gloriam  
perducamur. Per eundem Christum, &c.

## VESPERÆ DOMINICALES

E T

## COMPLETORUM.

DOMINICA

AD VESPERAS.

*Psalm. 109.*

**D**ixit Dominus Domino meo : sede  
à dextris meis.

Donec ponam inimicos tuos : scabel-  
lum pedum tuorum.

Virgam virtutis tuæ emittet Domi-  
nus ex Sion : dominare in medio inimi-  
corum tuorum.

Tecum principium in die virtutis tuæ,  
in splendoribus sanctorum : ex utero  
ante luciferum genui te.

Juravit Dominus , & non pœnitebit  
eum : tu es Sacerdos in æternum , se-  
cundùm ordinem Melchisedech.

Dominus à dextris tuis : confregit in  
die iræ suæ Reges.

Judicabit in nationibus, implebit ruinas,  
conquassabit capita in terra multorum.

De torrente in via bibet : propterea  
exaltabit caput.

Gloria Patri, & Filio, &c.

Sicut erat in principio, &c.

*Pſalm. 110.*

**C**onfitebor tibi, Domine, in toto  
corde meo ; in consilio justorum  
& congregatione.

Magna opera Domini : exquisita in  
omnes voluntates ejus.

Confessio & Magnificentia opus ejus :  
& justitia ejus manet in sæculum sæculi.

Memoriam fecit mirabilium suorum  
misericors & miserator Dominus : escam  
dedit timentibus se.

Memor erit in sæculum testamenti  
sui : virtutem operum suorum annun-  
tiabit populo suo.

Ut det illis hereditatem gentium : ope-  
ra manuum ejus veritas & judicium.

Fidelia omnia mandata ejus, confir-  
mata in sæculum sæculi : facta in veri-  
tate & æquitate.

Redemptionem misit populo suo : man-  
davit in æternum testamentum suum.

Sanctum & terribile nomen ejus : initium sapientiæ , timor Domini.

Intellectus bonus omnibus facientibus eum : laudatio ejus manet in sæculum sæculi.

Gloria Patri, &c.

Sicut erat in principio, &c.

*Psalm. III.*

**B**Eatus vir qui timet Dominum : in mandatis ejus volet nimis.

Potens in terra erit semen ejus , generatio rectorum benedicetur.

Gloria & divitiæ in domo ejus : & justitia ejus manet in sæculum sæculi.

Exortum est in tenebris lumen rectis : misericors & miserator , & justus.

Jucundus homo qui miseretur & commodat , disponet sermones suos in judicio : quia in æternum non commovebitur.

In memoria æterna erit justus : ab auditione mala non timebit.

Paratum cor ejus sperare in Domino , confirmatum est cor ejus : non commovebitur donèc despiciat inimicos suos.

Dis-

Dispersit, dedit pauperibus, justitia  
ejus manet in sæculum sæculi: cornu  
ejus exaltabitur in gloria.

Peccator videbit, & irascetur, denti-  
bus suis fremet & tabescet: desiderium  
peccatorum peribit.

Gloria Patri, &c.

Sicut erat, &c.

*Psalms. 112.*

**L**audate pueri Dominum: laudate  
nomen Domini.

Sit nomen Domini benedictum: ex  
hoc nunc & usque in sæculum.

A solis ortu usque ad occasum:  
laudabile nomen Domini.

Excelsus super omnes gentes Domi-  
nus: & super cœlos gloria ejus.

Quis sicut Dominus Deus noster qui  
in altis habitat: & humilia respicit in  
cœlo & in terra.

Suscitans à terra inopem: & de ster-  
core erigens pauperem.

Ut collocet eum cum principibus:  
cum principibus populi sui.

**M**

Qui habitare facit sterilem in domo:  
Matrem Filiorum lætantem.

Gloria Patri, &c. Sicut erat, &c.

*Psalm. 113.*

**I**N exitu Israël de Ægypto: domus  
Jacob de populo barbaro.

Facta est Judæa sanctificatio ejus:  
Israël potestas ejus.

Mare vidit, & fugit, Jordanis con-  
versus est retrorsum.

Montes exultaverunt ut arietes: &  
colles sicut agni ovium.

Quid est tibi mare: quodd fugisti? & tu  
Jordanis, quia conversus es retrorsum?

Montes exultastis sicut arietes: &  
colles sicut agni ovium.

A facie Domini mota est terra: a  
facie Dei Jacob.

Qui convertit Petram in stagna aqua-  
rum: & rupem in fontes aquarum.

Non nobis, Domine, non nobis:  
sed nomini tuo da gloriam.

Super misericordia tua & veritate tua:  
nequando dicant Gentes, ubi est Deus  
eorum.

Deus autem noster in coelo: omnia  
quæcumque voluit fecit.

Simulacra Gentium argentum & au-  
rum: opera manuum hominum.

Os habent, & non loquentur: oculos  
habent & non videbunt.

Aures habent, & non audient: nares  
habent, & non odorabunt.

Manus habent & non palpabunt: pe-  
des habent, & non ambulabunt, non  
clamabunt in gutture suo.

Similes illis fiant qui faciunt ea: &  
omnes qui confidunt in eis.

Domus Israël speravit in Domino,  
adjutor eorum & protector eorum est.

Domus Aäron speravit in Domino:  
adjutor eorum & protector eorum est.

Qui timent Dominum, speraverunt  
in Domino: adjutor eorum & protector  
eorum est.

Dominus memor fuit nostri: & bene-  
dixit nobis.

Benedixit domui Israël: benedixit do-  
mui Aäron.

Benedixit omnibus qui timent Dominum: pusillis cum majoribus.

Adjiciat Dominus super vos: super vos & super filios vestros.

Benedicti vos à Domino: qui fecit coelum & terram.

Coelum coeli Domino: terram autem dedit filiis hominum.

Non mortui laudabunt te Domine: neque omnes, qui descendunt in infernum.

Sed nos qui vivimus benedicimus Domino: ex hoc nunc & usque in sæculum.

Gloria Patri, &c. Sicut erat, &c.

## CANTICUM

*B. Mariæ Virginis.*

*Luc. 1.*

**M**agnificat, anima mea Dominum.  
Et exultavit spiritus meus: in Deo salutari meo.

Quia respexit humilitatem ancillæ suæ: ecce enim ex hoc beatam me dicent omnes generationes.

Quia fecit mihi magna qui potens est: & sanctum nomen ejus.



Et misericordia ejus à progenie in progenies : timentibus eum.

Fecit potentiam in brachio suo : dispersit superbos mente cordis sui.

Deposuit potentes de sede : & exaltavit humiles.

Esurientes implevit bonis : & divites dimisit inanes.

Suscepit Israël puerum suum : recordatus misericordiæ suæ.

Sicut locutus est ad Patres nostros : Abraham & semini ejus in sæcula.

Gloria Patri, &c. Sicut erat, &c.

**AD COMPLETORIUM.**

**C**onverte nos Deus salutaris noster.  
R. Et averte iram tuam à nobis.

ψ. Deus in adjutorium meum intende.

R. Domine ad adjuvandum me festina.

Gloria Patri, & Filio, & Spiritui Sancto.

Sicut erat in principio, & nunc, & semper, & in sæcula sæculorum. Amen.

**C**UM invocarem, exaudivit me  
Deus justitiæ meæ: in tribulatione  
dilatasti mihi.

Miserere mei, & exaudi orationem  
meam.

Filii hominum, usquequò gravi cor-  
de? ut quid diligitis vanitatem, & quæ-  
ritis mendacium.

Et scitote quoniam mirificavit Do-  
minus Sanctum suum: Dominus ex-  
audiet me, cum clamavero ad eum.

Iraſcimini & nolite peccare: quæ di-  
citis in cordibus vestris, in cubilibus  
vestris compungimini.

Sacrificate sacrificium justitiæ, &  
sperate in Domino: multi dicunt, quis  
ostendit nobis bona.

Signatum est super nos lumen vultus  
tui, Domine: dedisti lætitiā in corde  
meo.

A fructu frumenti, vini, & olei sui:  
multiplicati sunt.

In pace in idipsum: dormiam & re-  
quiescam.

Quoniam tu Domine singulariter in  
Ipe; constituisti me.

Gloria Patri, & Filio, & Spiritui  
Sancto.

Sicut erat in principio, & nunc, & sem-  
per, & in sæcula sæculorum. Amen.

*Psal. 30.*

**I**N te Domine, speravi, non confun-  
dar in æternum: in iustitia tua libera  
me.

Inclina ad me aurem tuam: accelera  
ut eruas me.

Esto mihi in Deum protectorem, & in  
domum refugii; ut saluum me facias.

Quoniam fortitudo mea & refugium  
meum es tu: & propter nomen tuum de-  
duces me, & enutries me.

Educes me de laqueo hoc, quem  
absconderunt mihi: quoniam tu es pro-  
tector meus.

In manus tuas commendo spiritum  
meum: redemisti me Domine Deus  
veritatis.

Gloria Patri, & Filio, & Spiritui  
Sancto.

M 4

Sicut erat in principio, & nunc, & semper, & in sæcula sæculorum. Amen.

*Psalm. 90.*

**Q**ui habitat in adiutorio Altissimi: in protectione Dei cœli commorabitur.

Dicet Domino, susceptor meus es tu: & refugium meum, Deus meus, sperabo in eum.

Quoniam ipse liberavit me de laqueo venantium: & à verbo aspero.

Scapulis suis obumbrabit tibi, & sub pennis ejus sperabis.

Scuto circumdabit te veritas ejus: non timebis à timore nocturno.

A sagitta volante in die, à negotio perambulante in tenebris: ab incursu, & dæmonio meridiano.

Cadent à latere tuo mille, & decem millia à dextris tuis: ad te autem non appropinquabit.

Verumtamen oculis tuis considerabis: & retributionem peccatorum videbis.

Quoniam tu es, Domine, spes mea: altissimum posuisti refugium tuum.

Non accedet ad te malum : & flagellum non appropinquabit tabernaculo tuo.

Quoniam Angelis suis mandavit de te : ut custodiant te in omnibus viis tuis.

In manibus portabunt te : ne forte offendas ad lapidem pedem tuum.

Super aspidem & basiliscum ambulabis : & conculcabis leonem & draconem.

Quoniam in me speravit , liberabo eum : protegam eum quoniam cognovit nomen meum.

Clamabit ad me , & ego exaudiam eum , cum ipso sum in tribulatione : eripiam eum & glorificabo eum.

Longitudine dierum replebo eum : & ostendam illi salutare meum.

Gloria Patri , & Filio , & Spiritui Sancto.

Sicut erat in principio , & nunc , & semper , & in sæcula sæculorum. Amen.

*Psalm. 131.*

**E**cce nunc benedicite Dominum : omnes servi Domini.

Qui statis in domo Domini : in atriis domus Dei nostri.

In noctibus extollite manus vestras in sancta, & benedicite Dominum.

Benedicat te Dominus ex Sion : qui fecit cœlum & terram.

Gloria Patri, & Filio, & Spiritui Sancto.

Sicut erat in principio, & nunc & semper, & in sæcula sæculorum. Amen.

## CANTICUM SIMEONIS.

*Luc. 2.*

**N**unc dimittis servum tuum Domine, secundum verbum tuum in pace.

Quia viderunt oculi mei : salutare tuum.

Quod parasti ante faciem omnium populorum.

Lumen ad revelationem gentium : & gloriam plebis tuæ Israël.

Gloria Patri, & Filio, & Spiritui Sancto.

Sicut erat in principio, & nunc, & semper, & in sæcula sæculorum. Amen.

# MODUS

## INSERVIENDI SACRO.

*Sacerdos.* **I**N nomine Patris, & Filii, & Spiritus Sancti. Amen. Introibo ad Altare Dei.

*Minister.* Ad Deum qui lætificat juventutem meam.

*Sac.* Judica me Deus, & discerne causam meam de gente non sancta: ab homine iniquo & doloso erue me.

*Min.* Quia tu es Deus fortitudo mea, quare me repulisti, & quare tristis incedo, dum affligit me inimicus.

*Sac.* Emitte lucem tuam, & veritatem tuam: ipsa me deduxerunt & adduxerunt in montem sanctum tuum, & in tabernacula tua.

*Min.* Et introibo ad Altare Dei, ad Deum qui lætificat juventutem meam.

*Sac.* Confitebor tibi in cithara Deus, Deus meus: quare tristis es anima mea, & quare conturbas me.

*Min.* Spera in Deo quoniam adhuc confitebor illi: salutare vultus mei, & Deus meus.

*Sac.* Gloria Patri, & Filio, & Spiritui Sancto.

*Min.* Sicut erat in principio, & nunc, & semper, & in sæcula sæculorum. Amen.

*Sac.* Et introibo ad Altare Dei.

*Min.* Ad Deum qui lætificat juventutem meam.

*Sac.* Adjutorium nostrum in nomine Domini.

*Min.* Qui fecit cœlum & terram.

*Sac.* Confiteor Deo omnipotenti, Beatæ Mariæ semper Virgini, Beato Michaëli Archangelo, Beato Joanni Baptistæ, Sanctis Apostolis Petro & Paulo, omnibus Sanctis, & vobis Fratres quia peccavi nimis cogitatione, verbo & opere: meâ culpâ, meâ culpâ, meâ maximâ culpâ. Ideò precor Beatam Mariam semper Virginem, Beatum Michaëlem Archangelum, Beatum Joannem Baptistam, Sanctos Apostolos Petrum & Paulum, omnes Sanctos, & vos Fratres orare pro me ad Dominum Deum nostrum.

*Min.* Misereatur tui omnipotens Deus, & dimissis peccatis tuis, perducatur te ad vitam æternam.

*Sac.* Amen.

*Min.* Confiteor Deo omnipotenti, Beatæ Mariæ semper Virgini, Beato Michaëli Archangelo, Beato Joanni Baptistæ, Sanctis Apo-



stolis Petro & Paulo, omnibus Sanctis, & tibi Pater, quia peccavi nimis cogitatione, verbo & opere: meâ culpâ, meâ culpâ, meâ maximâ culpâ. Ideò precor Beatam Mariam semper Virginem, Beatum Michaëlem Archangelum, Beatum Joannem Baptistam, Sanctos Apostolos Petrum & Paulum, omnes Sanctos, & te Pater orare pro me ad Dominum Deum nostrum.

*Sac.* Misereatur vestri omnipotens Deus, & dimissis peccatis vestris, perducatur vos ad vitam æternam.

*Min.* Amen.

*Sac.* Indulgentiam, absolutionem & remissionem peccatorum nostrorum tribuat nobis omnipotens & misericors Dominus.

*Min.* Amen.

*Sac.* Deus tu conversus vivificabis nos.

*Min.* Et plebs tua lætabitur in te.

*Sac.* Ostende nobis Domine, misericordiam tuam.

*Min.* Et salutare tuum da nobis.

*Sac.* Domine exaudi orationem meam.

*Min.* Et clamor meus ad te veniat.

*Sac.* Dominus vobiscum.

*Min.* Et cum spiritu tuo.

*Sac.* Oremus, aufer à nobis, quæsumus &c

*Modus inserviendi**Ante Epistolam.**Sac.* Kyrie eleïson. *Min.* Kyrie eleïson.*Sac.* Kyrie eleïson. *Min.* Christe eleïson.*Sac.* Christe eleïson. *Min.* Christe eleïson.*Sac.* Kyrie eleïson. *Min.* Kyrie eleïson.*Sac.* Kyrie eleïson.*Sac.* Dominus vobiscum.*Min.* Et cum spiritu tuo.*Sac.* Per omnia sæcula sæculorum.*Min.* Amen.*In fine Epistola respondendum est altæ voci.**Min.* Deo gratias.*Ad Evangelium.**Sac.* Dominus vobiscum.*Min.* Et cum spiritu tuo.*Sac.* Sequentia ( *vel initium* ) Sancti Evangelii secundum Matthæum, Joannem, &c.*Min.* Gloria tibi Domine.*In fine Evangelii respondendum est altæ voci.**Min.* Laus tibi Christe.*Post Evangelium.**Sac.* Dominus vobiscum.*Min.* Et cum spiritu tuo.

*Respondendum est quod sequitur quando Sacerdos dicit.*

*Orate Fratres,*

*Min.* Suscipiat Dominus Sacrificium de manibus tuis, ad laudem & gloriam nominis sui, ad utilitatem quoque nostram totiusque Ecclesiæ suæ sanctæ.

*Sac.* Per omnia sæcula sæculorum.

*Min.* Amen.

*Sac.* Dominus vobiscum.

*Min.* Et cum spiritu tuo.

*Sac.* Sursum corda.

*Min.* Habemus ad Dominum.

*Sac.* Gratias agamus Domino Deo nostro.

*Min.* Dignum & justum est.

*Ad Corporis Domini elevationem pulsanda est campana: similiter & ad Sanguinis Domini elevationem.*

*Post Elevationem.*

*Sac.* Per omnia sæcula sæculorum.

*Min.* Amen.

*Sac.* Et ne nos inducas in tentationem.

*Min.* Sed libera nos à malo.

*Sac.* Per omnia sæcula sæculorum.

*Min.* Amen.

*Sac.* Pax Domini sit semper vobiscum.

192 *Modus inserviendi Sacro.*

*Min.* Et cum spiritu tuo.

*Post S. Eucharistia sumptionem.*

*Sac.* Dominus vobiscum.

*Min.* Et cum spiritu tuo.

*Sac.* Per omnia sæcula sæculorum.

*Min.* Amen.

*Sac.* Dominus vobiscum.

*Min.* Et cum spiritu tuo.

*Sac.* Ite Missa est.

*Min.* Deo gratias.

*Sac.* Benedicat vos omnipotens Deus, Pa-  
ter, & Filius, & Spiritus Sanctus.

*Min.* Amen.

*Sac.* Dominus vobiscum.

*Min.* Et cum spiritu tuo.

*Sac.* Initium S. Evangelii secundum Joan-  
nem.

*Min.* Gloria tibi Domine.

*In fine cujusvis Evangelii respondendum est*

*Min.* Deo gratias.

**F I N I S.**



---

*Vidit & Approbavit hac 1. Aug. 1741.*

*Æ. F. AUDENAERT,*

*Librorum Censor.*

*Vidit D. SERVAES Lib. Cens. Reg.*

*Modus inferiabilis*  
lin. Et cum spiritu tuo.  
Post S. Eucharistia sumpta  
c. Dominus vobiscum.  
n. Et cum spiritu tuo.  
Per omnia secula seculorum  
i. Amen.  
Dominus vobiscum.  
Cum spiritu tuo.

12/27/21